


Vl. 157.

A. R. I. o. 54.

1913.

Gracia Kittling

V. 1. 1. 1.




*ante Titulum.*



*Marcus Pitteri sculpsit Venet.*

P. VIRGILII MARONIS  
OPERA.  
VOL. I.



EX ANTIQUIS MONIMENTIS ILLUSTRATA  
CURA, STUDIO & SUMTIBUS  
HENRICI JUSTICE  
ARMIGERI, RUFFORTHII TOPARCHÆ.



Wyższa Szkoła Pedagogiczna  
w Bydgoszczy  
Biblioteka Główna

S 2146



AUGUSTO ET INVICTO  
ROMANORUM IMPERATORI  
FRANCISCO.



OGITANTI mihi primum de  
Poëta nobilissimo eximia luce col-  
lustrando, non diu deliberandum fu-  
it, ad cujus pulvinar iste deponen-  
dus esset. Etenim non meis duntaxat desi-  
deriis, verum etiam quasi publicis nutibus,  
Tu MAXIME PRINCIPUM, unus de-  
signabare, ad quem, cum tutaminis indubi-  
tati fiducia, Maro confugeret: Et ad quem  
potius Maro, quam ad dignissimum Augusto  
succesorem, à quo tam magnifice liberaliter-  
que olim habitus est, quique dignum laude

virum mori vetuit, ne eo, quo nunc equidem meritis suis superbit, splendore defraudaretur? Itaque vates novo vultu haud indecoro resurgens tuis, o REDUX AUGUSTE, faustis penetralibus lætus iterum se sistit, avitumque decus atque præsidium, sibi ac Mantuæ, deliciis suis, prolixè præstitum, ab Augustissimi nominis tui præscriptione denuo expetit. Meorum votorum summa est, ut Romanæ aquilæ, fulminis ministræ, Te stantem Imperii columnam lauro protegant: ut Josephus Tuus, Iulum Æneæ multis passibus superans, Patrem per omnia honoris et felicitatis incrementa sequatur, nostra que ætas cum sera posteritate perpetuo accinat,

Immortale genus maneat, multosque per annos  
siet fortuna Domus, et Avi numerentur Avorum.

MAJESTATI TUÆ

devotus

*H. Justice.*



VITA P. VIRGILII MARONIS.



NATUS est P. Virgilius Maro anno VC. DCLXXXIV. Cn. Pompeio Magno et M. Licinio Crasso Coss. Idibus Octob. in pago, qui Andes dicebatur, hodie

Pietola, à Mantuâ non procul, septem fere annis ante Octavium, qui postea Cæsar Augustus dictus est. Patrem habuit fortunâ tenui, quem alii sigillum; alii primò mercenarium Maui cujusdam viatoris, postea ejusdem generum et agriculturæ deditum tradunt.

Ortum Virgiliti miraculis nobilitavit prona in mendacium vulgi admiratio: Matrem pridie quàm pareret, somniasse genitum ex se laureum ramum, quem contactâ terrâ statim excrevisse, in maturâ arborem, pomis gravatam et floribus: infantem ipsum in lucem produsse vagitu nullo: Cùm in

viâ mater partu se levasset, virgam populeam, ut moris erat in illâ regione, ibidem loci statim de-  
pactam, ita brevi coaluisse, ut multò antè satas  
populos adæquaret; quam postea Virgiliû arbo-  
rem dictam, summâ gravidarum et fetarum reli-  
gione celebratam fuisse. Nunc etiam magum  
quemdam præcellentem fuisse illum Virgiliû, a  
quo immanis Pausilypi specus excavata est, gar-  
rit agrestis vicinia.

Cremonæ primum studiis eruditus, anno fere  
ætatís decimo sexto Mediolanum se contulit, ubi  
virilem togam sumsisse traditur eo forte ipso die,  
quo Lucretius vitâ decessit; quasi cum Musæ tanti  
ingenii heredem jam tum ostentarent. Haud ita  
multo post concessit Neapolim. Quibus in oppidis,  
ardens ingenito amore Poëseos, ac totam vim gus  
animo præcipiens, accinxit se ad tantum opus  
omni genere studiorum. Non ille Poësim ita ag-  
gressus est, ut inanem sonitum ciceret; non cru-  
dam adhuc Musam et primo haustu statim e-  
briam in Parnassum intulit; sed cum eam esse  
existimaret artem, quam subsidio niti oporteret  
artium maximarum, in studiis latens tandiû  
excoluit animum, donec bonam frugem maturis

jam viribus ferre posset. Neque enim sagacissimorû  
virorum iudicio, Virgilio tribuenda sunt inficeta  
illa poëmatia, quæ vulgò circumferuntur, tan-  
quam prima Virgilianæ poëseos rudimenta: ibi  
furta quidem ex Virgilio aliquot, sed nulla tanti  
ingenii lineamenta deprehenduntur. Primam i-  
gitur ætatís partem in eo posuit ut literis non  
solum Græcis et Latinis, sed Historiæ, Philoso-  
phiæ, Medicinæ et Mathematicis operam  
daret. Et Philosophiæ quidem magistrum habu-  
it Syronem Epicureum, cuius placita de rerum  
origine descripsit Eclogâ sextâ ad Varum, qui  
eodem magistro fuerat usus. Audiit in Græcis  
præceptorem Parthenium, qui et ipse Poëta fuit  
haud ignobilis.

Hac instructus suppellectile literarum, ad Poë-  
sim tandem extulit animos: ac post pugnam  
Philippensem, cum trans Padum agri Veteranis  
Triumvirorum jussu dividerentur, ipse fundo  
suo ab Ario Centurione dejectus, Romam venit.  
Ibi per Asinium Pollionem, quem jam in Gal-  
liâ Cisalpinâ versantem coluerat, Mæcenati; per  
Mæcenatem Octaviano commendatus id impe-  
travit, ut ager sibi restitueretur. Tum Bucolica

exorsus est anno ætatis vicesimo nono: ac Mantuam reversus, cum ab Ario fundum repeteret, ab eo parum absuit quin occideretur. Romam igitur regressus, ut vim sibi illatam quereretur, nonam Eclogam obtulit Væro apud Octavianum gratioso. Bucolica triennio absolvit, in quibus Cæsarem laudat et cæteros, per quos suas in sedes redierat.

Deinde paterni rursus memor et Agriculture studiis innutritus, Georgica scripsit in honore Mæcenatis, cuius ope sua receperat. Incubuit autem operi tam terso et limato per septem annos, maxime Neapoli. Ac tunc temporis traditur quotidie meditados mane plurimos versus dictare solitus, quos per totum diem retractando redigebat ad paucissimos; cum ipse diceret parere se versus more ursino: nam recentes ingenii sui partus rudi esse et imperfecta facie; sed deinde fingendo tractando que reddere se iis oris et vultus lineamenta.

Tum concepit animo magnificam illam molem Æneidos, cuius consilium paucis delineare operæ pretium est. Vix requieverat Romana res ab illa jactatione bellorum civilium, quibus à Ma-

rii Syllæ que temporibus ad Actiacam usque pugnam concussa, toties in ruinam inclinaverat. Sine Rivali quidem Augustus, at non sine invidia rerum potiebatur: non jam præliis petebatur sed insidiis; erumpebant sæpe conjurationes in caput Principis; jacensque jam et emoriens Romana Libertas, instar valentis corporis, etiam in extremo spiritu minax, cum Victore luctabatur. Hos animorum æstus sedare Virgilius sibi proposuit; tenerasque et ex recentibus vulneribus adhuc molles Romanorum mentes ita levi manu tractare, ut Augusti Imperium æquo animo ferrent.

Neque solum Romanorum animos convertere decrevit ad amorem Principis, sed iis etiam ejus pectus imbuere studuit virtutibus, quæ eum qui imperat, suis quam acceptissimum efficiunt. Augustus in excelso ac præcipiti positus, hinc septus odiis, illinc adulationibus, inter infensos sibi et abjectos anceps adibat periculum, ne exasperatus ab illis ad scævitiã, ab iis corruptus ad superbiam efferretur. Hæc utraque pestis ne Principi noceret, ea præcipue vitia, quæ novæ præ-



sertim potentiae adhærescere solent, circumcidere Virgilius aggressus est, arrogantiam, sui Deorumque oblivionem, odia partium acrem injuriarum memoriam.

Itaque Poëta non famæ solum suæ, sed et Civibus et Principi serviens, hanc universo Poëmati subjecit sententiam, Deos eorum semper incolumitati invigilare quos ad magna rerum initia delegerunt; ut infensos Principi animos coereret: Tyrannis verò et iis qui inclementer imperant exitiosos plerumque exitus impendere; ut Augustum Romanis placabilem et in infinitâ potestate sui potentem præstaret.

Hæc autem documenta quo blandiùs influerent, fabulam ita finxit suam ut cum consilio suo maximè consentiret. Nam et pium sibi Heroa proposuit cui cum Augusto omnia convenirent; et eos ipsi comites adjunxit, ad quorum imaginem Romani eò se componerent libentius quòd ab iis ortos se gloriarentur. Ecquis enim Æneam et Augustum inter se contulerit, quin alterum ad alterius similitudinem factum intelligat? alter ex potentissimi Imperii ruinis et ex longo belli incendio, cæctinctâ Regum progenie,

ducentibus fatis eripitur; alter prolapsâ libertate, ex diuturnâ flammâ civilium bellorum, colliis inter se fractis que tot Ducibus egregiis, in Patriæ fermè cineribus remanet ultimus: Ille Mari Terrâque in Asiâ, Europâ et Africâ multis jactatus periculis, cum Juno Deos et Homines, Dido illecebras, Furnus Italiæ vires in ipsius exitium moveret; Hic et terrestribus et navalibus pugnis in omni parte Terrarum exercitatus, in Bruto et Cassio ipsos propè Libertatis Deos, in Antonio Turnum, in Cleopatrá et iram Junonis et Didonis lenocinia expertus: uterque novi in Italia Imperii Conditor; In hoc uterque occupatus, ut non armis solum sed legibus et institutis alter initia, alter conversionem tantarum rerum firmaret. Atque id etiam accessit, ut alter ex altero originem duceret, et quidquid juris Æneas ad regnandum et armis et Deorum dono sibi paraverat, id ad Augustum hereditate quadam delaberetur, Tot denique tam variis lineamentis in Heroe suo suum Principem Virgilius expressit, ut in Ænea velut in speculo et Augustus ipse se et Augustum Romani non agnoscere non possent.

Cum igitur ad id Augustus omni et consiliorum apparatu et mole bellorum spectaret, ut Romanum Imperium ad novam formam fingeret, eò quoque quidquid in Æneide narratur pertinere voluit Virgilius, ut Trojanum Imperium in Italia conderetur. Hoc unum totâ Æneide agitur; quæ quidem propositi simplicitas et rerum dignitate, et eventuum admirabilitate et narrandi verisimilitudine et jucunditate commendatur.

Hoc autem tanti consilii Poëma dum scriberet, ne quid impetum moraretur, quædam imperfecta reliquit; alia levissimis versibus tantum quasi delineavit, quos per jocum pro tigillis ac tibicinibus supponi à se dicebat ad fulciendum ædificium, donec columnæ advenirent. Quod quidem opus tractavit per duodecim annos, abditus ferè amœno partim Campanicæ partim Siciliæ recessu.

Tanta fuit fama viæ inchoatæ Æneidos, ut jam tum Sextus Propertius exclamaverit,

*Cedite Romani Scriptores, cedite Graii:*

*Nescio quid majus nascitur Iliade.*

Augustus verò cum fortè bello Cantabrico detineretur, supplicibusque et minacibus etiam per jocum literis efflagitaret ut sibi de Æneide (nam

ipsius verba sunt) vel prima carminis hypographa vel aliquod colon mitteret, negavit se facturum Poëta sui minimè ostentator epistolâ quâdã, cujus hanc particulam ad nos transmisit Macrobius: *de Ænea quidem meo, si me hercule jam dignum auribus haberem tuis, libenter mitterem. Sed tanta inchoata res est ut penè vitio mentis tantum opus ingressus mihi videar; cum præsertim, ut scis, alia quoque studia ad id opus multoque potiora impartiar. Eidem tamen Augusto aliquãto post, secundum, quartum et sextum libros recitasse traditur; hunc autem præcipuè ut Octaviæ gratificaretur, quæ cum recitationi interesset, ad illos de filio suo Marcello versus tanto affectu imbutos, defecisse fertur, ac dena sestertia pro singulis versibus Virgilio dari jussisse. Neque verò cuiquam recitabat Virgilius nisi invitus, et ea ferè de quibus ambigebat, ut judicium hominum exploraret, cum non tam laudari se cuperes quàm fieri laudabilem.*

Sex posteriores libros quadriennio confecit; nã à morte Marcelli tot ferè anni sunt ad id tempus quo in Græciam profectus est. Et sanè in iis libris quædam sunt minùs matura et quæ levio-

operam arguunt. Absoluto tandem operi ut ultimam manum imponeret in Græciam navigavit, ubi per otium abdere se totum in literis posset. Sed cum Augusto ex Insulâ Samo ubi hiemaverat, Romam revertenti Athenis occurrisset, unâ cum eo redire statuit; Megaramque visendi causâ profectus, in ipso itinere languore correptus, auctâ per navigationem valetudine, Brundisium viâ appulit, ubi diebus paucis obiit decimo Kal. Octob. natus annos L. menses XI. dies VII. C. Sentio Saturnino et Q. Lucretio Vespillone Consulibus. Cum gravari se morbo sentiret, scribi sæpe efflagitavit crematurus *Aneida*: quibus negatis testamento comburi iussit, quippe inemendatam et imperfectam. Sed *Tucca* *Vario*que monentibus, id Augustum minimè permissurum, scripta sua eâ conditione legavit ne quid adderent, ac versus etiam imperfectos, si qui essent, relinquerent. Iussit ossa sua Neapolim transferri, ubi diu et suavissimè vixerat. Sepultus est viâ Puteolanâ intra lapidē secundū, ejusq. sepulchro Distichon hoc insculptum est, quod ipse sibi extremâ valetudine scripsisse perhibetur: Mantua me genuit, Calabri nupuer, tenet nunc Parthenope: Cecini pascua, rura, Duces.

Heredes fecit ex dimidiâ parte Valerium Proculum Fratrem ex alio Patre, ex reliquis Augustum, *Mæcenatem*, *Lucium Varium* et *Plotium Tuccâ* qui ejus post obitum *Aneidem*, sublatis tantum aliquot versibus, nullo addito emendaverunt. De consilio cremandæ *Aneidos* exstant *Sulpicii Carthaginensis* versus, quorum initium est;

Jusserat hæc rapidis aboleri carmina flammis  
Virgilius &c.

Quin et ipsi Augusto, non satis certâ fide tribuuntur alii plures hoc exordio;

Ergone supremis potuit vox improba verbis  
Tam dirum mandare nefas &c.

Fuisse traditur staturâ grandi, aquilino colore, facie rusticânâ, valetudine variâ, cum plerumque stomacho, faucibus ac dolore capitis laboraret, sanguinem etiam sæpius ejiceret; cibi vini que parcissimus. Possedit ferè centies sestertiūm ex largitionibus Amicorum, habuitque domum Romæ in *Esquilis* juxta hortos *Mæcenatis*, quamquam recessu Campaniæ, Siciliæ que plurimum utebatur.

Egisse causam dicitur semel omnino; sermone tardissimus ac penè indocto similis. Tradit

*M. Seneca, ut Ciceronem eloquentia sua in carminibus destituit, ita Virgilio illam ingenii felicitatem in oratione solutâ defuisse.*

*Tantâ fuit morum castitate, ut Neapoli Parthenias vulgò diceretur; tantâ modestiâ, ut si quando Romæ, quo rarò commebat, viseretur in publico, sectantes commonstrantesque se subterfugeret. Nec tamen caruit fructu laudis, quæ dum repudiatur, cumulator redire solet: nam Populus auditis in theatro Virgilio verbis surrexit universus, et eum fortè præsentem spectantemque sic veneratus est quasi Augustum. Cum quidam versus ab eo factos sibi ascriberent, id non modò non cegre ferebat, sed sua etiam in aliis laudari libentissimè patiebatur: quod cum sæpe aliàs tum in hoc eleganti Disticho contigit.*

*Nocte pluit totâ, redeunt spectacula manè:*

*Divisum Imperium cum Jove Cæsar habet.*

*Cum aliquando Ennium legens interrogaretur, quid ageret, respondit aurum se colligere è stercore Ennii: benignus; cultor omnium bonorum atque eruditorum; ab invidia sic alienus, ut si quid eruditè dictum audiret alterius, non minùs gauderet ac si suum esset; neminem vituperare,*


*laudare bonos; eâ humanitate esse, ut eum nemo nisi perversus maxime non amaret. Nihil proprium habere videbatur; ejus bibliotheca non minùs aliis Doctis patebat quàm sibi; et illud Euripidis sæpe usurpabat, communia Amicorum esse omnia. Itaque Poëtas omnes æquales sibi sic adjunctos habuit, ut cum inter se plurimum invidiâ arderent, unum omnes colerent, Varius, Tucca, Gallus, Propertius. Ipse verò Horatius ingeniorum callidus explorator, etsi Poëseos admirator unicus et Artifex, Virgilium tamen ab animi candore et probitate præcipuè laudat, neque eum Poëtarum Principem, sed virum optimum dicit.*

*Magnâ apud Augustum gratiâ ad id usus est, ut plurimis beneficeret, noceret nemini. Bona cujusdam exulantis, offerente Augusto recusavit. Parentibus quotannis aurum ad abundantem victum mittebat, quos jam grandis amisit; ex quibus Patrè oculis captum et duos fratres germanos, Silonem imberem et Flaccum jam adultum.*


*Defuisset aliquid Virgilio in illo concentu laudis, nisi obtrectatores obmurmurassent. Sed neque olim dum viveret, neque etiam nunc cum scriptis suis vivat spiretq; semper, defuere unquam insulsi*

*Censores et iratis Musis geniti. Hos ille sic ulcisci solebat ut sileret, neque eorum fremitu à studiis suis avocari se pateretur. Asconius Pedianus libro, quem contra Virgilii obtrectatores scripserat, id ei potissimum objectum fuisse dicebat, quòd nec rectè historiam contexuisset, et pleraque desumpsisset ex Homero; illum verò hoc criminis sic defendere solitum; cur non et illi eadem quoque furta tētarent? sed intellecturos facilius esse Herculi clavam, quàm Homero versum surripere.*

*Verum ut tantum Poëtam pauci aliquot malevoli carioso dente arrosunt, ita cum ut Latinae Poëseos Principem ac penè Deum coluit maxima pars posteritatis. Virgilii imaginem venerabatur Silius, ejusque natalem religiosius quàm suum celebrabat, Neapoli maximè, ubi monumentum ejus adire, ut templum solebat. Virgilium, Platonem Poëtarum vocabat Imperator Alexander Severus, ejusque effigiem ut et Ciceronis in Larario habebat, quam divino ritu coleret. Sed potius quid ipse Virgilius canat, quam quid alii de eo judicent audiamus: cum ea sit, ut Macrobiü verbis utar, tanti Poëtae gloria, ut nullius laudibus crescat, nullius vituperatione minuatur.*



P. 1.



*M. Pitteri sculp. ven.*

P. 1.



*M. Pitteri sc. ven.*



P. VIRGILII MARONIS

*M.P.f.*

## BUCOLICA.

## ECLOGA I. TITYRUS.

MELIBŒUS, TITYRUS.



TITYRE, tu patulæ recubans sub tegmine  
fagi  
Silvestrem tenui Musam meditaris  
avena:

Nos patriæ fines, & dulcia linquimus arva;  
Nos patriam fugimus: tu, Tityre, lentus in umbra  
Formosam resonare doces Amaryllida silvas. 5  
T. O Melibœe, Deus nobis hæc otia fecit.  
Namque erit ille mihi semper deus: illius aram  
Sæpe tener nostris ab ovilibus imbuet agnus.

A



Ille meas errare boves, ut cernis, & ipsum  
 Ludere, quæ vellem, calamo permisit agresti. 10  
 M. Non equidem invideo: miror magis. undiq̄ totis  
 Usque adeo turbatur agris. en, ipse capellas  
 Protenus æger ago: hanc etiam vix, Tityre, duco.  
 Hic inter densas corulos modo namque gemellos,  
 Spem gregis, ah! filice in nuda connixa reliquit. 15  
 Sæpe malum hoc nobis, si mens non læva fuisset,  
 De cælo tactas memini prædicere quercus:  
 [Sæpe sinistra cava prædixit ab ilice cornix.]  
 Sed tamen, iste deus qui sit, da, Tityre, nobis.  
 T. Urbem, quam dicunt Romam, Melibœe, putavi 20  
 Stultus ego, huic nostræ similem, quo sæpe solemus  
 Pastores ovium teneros depellere foetus.  
 Sic canibus catulos similis, sic matribus hædos  
 Noram: sic parvis componere magna solebam.  
 Verum hæc tantum alias inter caput extulit urbis, 25  
 Quantum lenta solent inter viburna cupressi.  
 M. Et quæ tanta fuit Romam tibi causa videndi?  
 T. Libertas: quæ, læra tamen, respexit inertem;  
 Candidior postquam tondenti barba cadebat;  
 Respexit tamen, & longo post tempore venit, 30  
 Postquam nos Amaryllis habet, Galatea reliquit.  
 Namque \*(fatebor enim) dum me Galatea tenebat,

Nec spes libertatis erat, nec cura peculî:  
 Quamvis multa meis exiret victima septis,  
 Pinguis & ingrata premeretur caseus urbi, 35  
 Non unquã gravis ære domũ mihi dextra redibat.  
 M. Mirabar, quid mœsta deos, Amarylli, vocares:  
 Cui pendere sua patereris in arbore poma.  
 Tityrus hinc aberat. ipsæ te, Tityre, pinus,  
 Ipsi te fontes, ipsa hæc arbuta, vocabant. 40  
 T. Quid facerem? neque servitio me exire licebat,  
 Nec tam præsentis alibi cognoscere divos.  
 Hic illum vidi juvenem, Melibœe, quotannis  
 Bis senos cui nostra dies altaria fumant.  
 Hic mihi responsum primus dedit ille petenti: 45  
 Pascite, ut ante, boves, pueri: submitte tauros.  
 M. Fortunate senex! ergo tua rura manebunt?  
 Et tibi magna satis: quamvis lapis omnia nudus,  
 Limosque palus obducat pascua junco:  
 Non infueta gravis tentabunt pabula foetas: 50  
 Nec mala vicini pecoris contagia lædent.  
 Fortunate senex! hic inter flumina nota,  
 Et fontis sacros, frigus captabis opacum.  
 Hinc tibi, quæ semper vicino ab limite sepes,  
 Hyblæis apibus florem depasta salicti, 55  
 Sæpe levi somnum suadebit inire susurro.

Hinc alta sub rupe canet frondator ad auras;  
 Nec tamen interea rauca, tua cura, palumbes,  
 Nec gemere aëria cessabit turtur ab ulmo.  
 T. Ante leves ergo pascentur in aethere cervi, 60  
 Et freta defutuent nudos in litore piscis:  
 Ante, pererratis amborum finibus, exsul  
 Aut Ararim Parthus bibet, aut Germania Tigrim,  
 Quam nostro illius labatur pectore vultus.  
 M. At nos hinc alii sitientis ibimus Afros: 65  
 Pars Scythiam, & rapidum Cretae veniemus Oaxem,  
 Et penitus toto divisos orbe Britannos.  
 En, unquam patrios longo post tempore finis,  
 Pauperis & tugurii congestum cespite culmen,  
 Post aliquot, mea regna videns, mirabor aristas? 70  
 Impius hæc tam culta novalia miles habebit?  
 Barbarus has segetes? en, quo discordia civis  
 Produxit miseros! en, quis consecimus agros!  
 Infere nunc, Melibœe, puros; pone ordine vitis.  
 Ite meæ, felix quondam pecus, ite capellæ. 75  
 Non ego vos posthac, viridi projectus in antro,  
 Dumosa pendere procul de rupe videbo.  
 Carmina nulla canam: non, me pascente, capellæ,  
 Florentem cytisum, & salices carpētis amaras.  
 T. Hic tamen hanc mecū poteris requiescere noctem

Fronde super viridi: sunt nobis mitia poma, 81  
 Castaneæ molles, & pressi copia lactis.  
 Et jam summa procul villarum culmina fumant,  
 Majoresque cadunt altis de montibus umbrae:





ECLOGA II. ALEXIS.



FORMOSUM pastor Corydon ardebat  
Alexin,

Delicias domini: nec, quid speraret,  
habebat.

Tantum inter densas, umbrosa cacumina, fagos  
Assidue veniebat: ibi hæc incondita solus  
Montibus & silvis studio jactabat inani: 5  
O crudelis Alexi, nihil mea carmina curas?  
Nil nostri miserere? mori me denique cogis.  
Nunc etiam pecudes umbras & frigora captant:  
Nunc viridis etiam occultant spineta lacertos:  
Thestylis & rapido fessis messoribus æstu 10  
Allia serpillumque herbas contundit olentis.  
At mecum raucis, tua dum, vestigia lustrò,  
Sole sub ardenti resonant arbusta cicadis.

Nonne fuit satius, tristis Amaryllidis iras,  
Atque superba pati fastidia? nonne Menalcan? 15  
Quamvis ille niger, quamvis tu candidus esses.  
O formosè puer, nimium ne crede colori.  
Alba ligustra cadunt, vaccinia nigra leguntur.  
Despectus tibi sum, nec qui sim quæris, Alexi:  
Quam dives pecoris nivei, quam lactis abundans. 20  
Mille meæ Siculis errant in montibus agnæ.  
Lac mihi non æstate, novum non frigore desit.  
Canto, quæ solitus, si quando armenta vocabat,  
Amphion Dircaeus in Actæo Aracyntho.  
Nec sum adeo informis: nuper me in litore vidi, 25  
Quum placidum ventis staret mare. non ego Daphnim  
Judice te metuam, si numquam fallat imago.  
O tantum libeat mecum tibi sordida rura,  
Atque humilis habitare casas, & figere cervos,  
Hædorumque gregem viridi compellere hibisco! 30  
Mecum una in silvis imitabere Pana canendo.  
Pan primus calamos cera conjungere pluris  
Instituit: Pan curat ovis, oviunque magistros.  
Nec te pœniteat calamo trivisse labellum.  
Hæc eadem ut sciret, quid non faciebat Amyntas? 35  
Est mihi disparibus septem compacta cicutis  
Fistula, Damcetas dono mihi quam dedit olim,

Et dixit moriens: Te nunc habet ista secundum.  
 Dixit Damoetas: invidit stultus Amyntas.  
 Præterea duo, nec tuta mihi valle reperti, 40  
 Capreoli, sparsis etiam nunc pellibus albo,  
 Bina die siccant ovis ubera: quos tibi servo.  
 Jam pridem à me illos abducere Thestylis orat:  
 Et faciet: quoniam sordent tibi munera nostra.  
 Huc ades, ô formosè puer: tibi lilia plenis 45  
 Ecce ferunt nymphæ calathis: tibi candida Nais.  
 Pallentis violas & summa papavera carpens,  
 Narcissum & florem jungit bene olentis anethi.  
 Tum, casia, atque aliis intexens suavibus herbis,  
 Mollia luteola pingit vaccinia caltha. 50  
 Ipse ego cana legam tenera lanugine mala,  
 Castaneasque nuces, mea quas Amaryllis amabat.  
 Addam cerea prima: honos erit huic quoque pomo.  
 Et vos, ô lauri, carpam, & te, proxima myrte.  
 Sic positæ quoniam suavis miscetis odores. 55  
 Rusticus es, Corydon; nec munera curat Alexis:  
 Nec si muneribus certes, concedat Iolas.  
 Heu, heu, quid volui misero mihi? floribus austrum  
 Perditus, & liquidis immisi fontibus apros.  
 Quæ fugis, ah demens? habitarunt Dî quoque silvas, 60  
 Dardaniusque Paris. Pallas, quas condidit, arces

Ipsa colat, nobis placeant ante omnia silvæ.  
 Torva læna lupum sequitur: lupus ipse capellam:  
 Florentem cytisum sequitur lasciva capella:  
 Te Corydon, ô Alexi, trahit sua quemque voluptas. 65  
 Adspice; aratra jugo referunt suspensâ juvenci,  
 Et sol crescentis decedens duplicat umbras:  
 Me tamen urit amor: quis enim modus adsit amori?  
 Ah Corydon, Corydon, quæ te dementia cepit!  
 Semiputata tibi frondosa vitis in ulmo est. 70  
 Quin tu aliquid saltem, potius quorum indiget usus,  
 Viminibus mollique paras detexere junco?  
 Invenies alium, si te hic fastidit, Alexin.





ÆCLOGA III. PALÆMON.

MENALCAS, DAMOËTAS, PALÆMON.

**D**IC mihi, Damœta, cujum pecus? an  
Melibœi?

D. Non; verum Ægonis: nuper mihi  
tradidit Ægon.

M. Infelix ô semper, oves, pecus! ipse Nearam  
Dum fovet, ac, ne me sibi præferat illa, veretur,  
Hic alienus oves custos bis mulget in hora: 5  
Et lucus pecori, & lac subducitur agnis.

D. Parcius ista viris tamen objicienda memento.  
Novimus & qui te, transversa tuentibus hircis:  
Et quo, sed faciles, Nymphæ risere, sacello.

M. Tum, credo, quum me arbutū videre Myconis,  
Atque mala vitis incidere falce, novellas. 11


D. Aut hîc ad veteres fagos, quū Daphnidis arcū  
Fregisti & calamos: quæ tu, perverse Menalca,

Et quum vidisti puero donata, dolebas:  
Et, si non aliqua nocuisses, mortuus esses. 15  
M. Quid domini faciant, audent quum talia fures?  
Non ego te vidi Damonis, pessime, caprum  
Excipere insidiis, multum latrante Lycisca?  
Et quum clamarem: Quo nunc se proripit ille?  
Tityre, coge pecus: tu post carecta latebas. 20  
D. An mihi cantando victus non redderet ille,  
Quem mea carminibus meruisset fistula, caprum?  
Si nescis, meus ille caper fuit; & mihi Damon  
Ipse fatebatur: sed reddere posse negabat.  
M. Cantando tu illū? aut unquā tibi fistula cera 25  
Juncta fuit? non tu in triviis, indocte, solebas  
Stridenti miserum stipula disperdere carmen?  
D. Vis ergo, inter nos, quid possit uterq;, vicissim  
Experiamur? ego hanc vitulam (ne forte recuses,  
Bis venit ad mulctram, bimos alit ubere fœtus) 30  
Depono: tu dic, mecum quo pignore certes.  
M. De grege non ausim quidquam deponere tecū:  
Est mihi namque domi pater, est injusta noverca:  
Bisque die numerant ambo pecus, alter & hædos.  
Verum id, quod multo tute ipse fatebere majus, 35  
(Infanire libet quoniam tibi) pocula ponam  
Fagina, cœlatum divini opus Alcimedontis:

Lenta quibus torno facili superaddita vitis  
 Diffusos edera vestit pallente corymbos.  
 In medio duo signa, Conon: & quis fuit alter? 40  
 Descripsit radio totum qui gentibus orbem:  
 Tempora quæ messor, quæ curvus arator haberet:  
 Necdum illis labra admovi, sed condita servo.  
 D. Et nobis idem Alcimedon duo pocula fecit:  
 Et molli circum est anfas amplexus acantho: 45  
 Orpheaque in medio posuit, silvasque sequentis.  
 Necdum illis labra admovi, sed condita servo.  
 Si ad vitulam spectas, nihil est quod pocula laudes.  
 M. Numquã hodie effugies: veniã, quocumq; vocaris.  
 Audiat hæc tantum, vel qui venit: ecce, Palæmon. 50  
 Efficiam posthac, ne quemquam voce laceffas.  
 D. Quin age, si quid habes; in me mora non erit ulla:  
 Nec quemquam fugio: tantum, vicine Palæmon,  
 Sensibus hæc imis (res est non parva) reponas.  
 P. Dicite: quandoquidẽ in molli confedimus herba. 55  
 Et nunc omnis ager, nunc omnis parturit arbos:  
 Nunc frondent silvæ: nunc formosissimus annus.  
 Incipe, Damoceta: tu deinde sequere, Menalca.  
 Alternis dicetis: amant alterna Camœnæ.  
 D. Ab Jove principiũ Musæ: Jovis omnia plena: 60  
 Ille colit terras: illi mea carmina curæ.

M. Et me Phœbus amat: Phœbo sua semper apud me  
 Munera sunt, lauri, & suave rubens hyacinthus.  
 D. Malo me Galatea petit lasciva puella;  
 Et fugit ad salices, & se cupit ante videri. 65  
 M. At mihi sese offert ultro, meus ignis, Amyntas:  
 Notior ut jam sit canibus non Delia nostris.  
 D. Parta meæ Veneri sunt numerata: namque notavi  
 Ipse locum, aëriæ quo congestere palumbes.  
 M. Quod potui, puero silvestri ex arbore lecta 70  
 Aurea mala decem mihi: cras altera mittam.  
 D. O quoties, & quæ nobis Galatea locuta est!  
 Partem aliquam venti divum referatis ad auris.  
 M. Quid prodest, quod me ipse animo non spernis, Amynta;  
 Si, dum tu sectaris apros, ego retia servo? 75  
 D. Phyllida mitte mihi: meus est natalis, Iola:  
 Cum faciam vitula pro frugibus, ipse venito.  
 M. Phyllida amo ante alias: nam me discedere flevit:  
 Et, Longum formose vale, vale, inquit, Iola.  
 D. Triste lupus stabulis, maturis frugibus imbres,  
 Arboribus venti, nobis Amaryllidis iræ. 81  
 M. Dulce satis humor, depullis arbutus hædis,  
 Lenta salix foeto pecori, mihi solus Amyntas.  
 D. Pollio amat nostram, quamvis est rustica, Musam:  
 Pierides, vitulam lectori pascite vestro. 85  
 M. Pollio & ipse facit nova carmina: pascite taurum,

Jam cornu petat, & pedibus qui spargat arenam.  
 D. Qui te, Pollio, amat, veniat, quo te quoq; gaudet.  
 Mella fluant illi, ferat & rubus asper amomum.  
 M. Qui Bavium non odit, amet tua carmina, Mævi:  
 Atque idem jungat vulpes, & mulgeat hircos. 91  
 D. Qui legitis flores, & humi nascentia fraga,  
 Frigidus, ô pueri, fugite hinc, latet anguis in herba.  
 M. Parcite oves nimium procedere: non bene ripæ  
 Creditur: ipse aries etiam nunc vellera siccat. 95  
 D. Tityre, pascens à flumine reice capellas:  
 Ipse, ubi tempus erit, omnis in fonte lavabo.  
 M. Cogite ovis, pueri: si lac præceperit æstus,  
 Ut nuper, frustra pressabimus ubera palmis.  
 D. Heu, heu, quã pingui macer est mihi taurus in ervo!  
 Idem amor exitium pecori, pecorisque magistro. 101  
 M. His certe neque amor causa est: vix ossibus hærent.  
 Nescio quis teneros oculus mihi fascinat agnos.  
 D. Dic, quibus in terris, & eris mihi magnus Apollo,  
 Tris pateat cœli spatium non amplius ulnas. 105  
 M. Dic, quibus in terris inscripti nomina regum  
 Nascantur flores: & Phyllida solus habeto.  
 P. Non nostrum inter vos tantas componere litis:  
 Et vitula tu dignus, & hic: & quisquis amores  
 Aut metuet dulcis, aut experietur amarus. 110  
 Claudite jam rivos, pueri: sat prata biberunt.



Marcus Püzeri Sculpsit Ven.



ECLOGA IV. POLLIO. *M. P. f.*



ICELIDES Musæ, paullo majora  
canamus.

Non omnes arbuta juvant, humilesque  
myricæ.

Si canimus silvas, silvæ sint Consule dignæ.  
 Ultima Cumæi venit jam carminis ætas:  
 Magnus ab integro seclorum nascitur ordo. 5  
 Jam redit & Virgo: redeunt Saturnia regna:  
 Jam nova progenies cœlo demittitur alto.  
 Tu modo nascenti puero, quo ferrea, primum  
 Desinet, ac toto surget gens aurea mundo,  
 Casta fave Lucina: tuus jam regnat Apollo. 10  
 Teque adeo decus hoc ævi, te Consule, inibit  
 Pollio: & incipient magni procedere menses.  
 Te duce, si qua manent, sceleris vestigia nostri,  
 Irrita perpetua solvent formidine terras.  
 Ille deum vitam accipiet, divisque videbit 15



Permixtos heroas, & ipse videbitur illis,  
 Pacatumque reget patriis virtutibus orbem.  
 At tibi prima, puer, nullo munuscula cultu,  
 Errantis ederas passim cum baccare tellus,  
 Mixtaque ridenti colocasia fundet acantho. 20  
 Ipsæ lacte domum referent distenta capellæ  
 Ubra: nec magnos metuent armenta leones.  
 Ipsa tibi blandos fundent cunabula flores.  
 Occidet & serpens, & fallax herba veneni  
 Occidet: Assyrium vulgo nascetur amomum. 25  
 At simul heroum laudes & facta parentis  
 Jam legere, & quæ sit poteris cognoscere virtus:  
 Molli paullatim flavescet campus arista,  
 Incultisque rubens pendeat sentibus uva:  
 Et duræ quercus sudabunt roscida mella. 30  
 Pauca tamen suberunt prisca vestigia fraudis,  
 Quæ tentare Thetim ratibus, quæ cingere muris  
 Oppida, quæ jubeant telluri infundere sulcos.  
 Alter erit tum Tiphys, & altera quæ vehat Argo  
 Delectos heroas: erunt etiam altera bella: 35  
 Atque iterum ad Trojam magnus mittetur Achilles.  
 Hinc, ubi jam firmata virum te fecerit ætas,  
 Cedet & ipse mari vector; nec nautica pinus  
 Mutabit merces: omnis feret omnia tellus.

Non rastros patietur humus, non vinea falcem. 40  
 Robustus quoque jam tauris juga solvet arator.  
 Nec varios discet mentiri lana colores.  
 Ipse sed in pratis aries jam suave rubenti  
 Murice, jam croceo mutabit vellera luto.  
 Sponte sua sandyx pascentis vestiet agnos. 45  
 Talia secla, suis dixerunt, currite, filis  
 Concordes stabili fatorum numine Parcæ.  
 Adgredere ô magnos (aderit jam tempus) honores,  
 Cara deûm suboles, magnum Jovis incrementum!  
 Adspice convexo nutantem pondere mundum, 50  
 Terrasque, tractusque maris, cælumque profundum:  
 Adspice, venturo lætentur ut omnia secla.  
 O mihi tam longæ maneat pars ultima vitæ,  
 Spiritus & quantum sat erit tua dicere facta!  
 Non me carminibus vincet nec Thracius Orpheus, 55  
 Nec Linus: huic mater quamvis, atque huic pater adlit:  
 Orphei Calliopea, Lino formosus Apollo.  
 Pan etiam, Arcadia mecum si iudice certet,  
 Pan etiam Arcadia dicat se iudice victum.  
 Incipe, parve puer, risu cognoscere matrem: 60  
 Matri longa decem tulerunt fastidia menses.  
 Incipe, parve puer: cui non risere parentes,  
 Nec deus hunc mensa, dea nec dignata cubili est.



ECLOGA V. DAPHNIS.

MENALCAS, MOPSUS.



UR non, Mopse, boni quoniam  
convenimus ambo,  
Tu calamos inflare levis, ego dicere  
versus,


Hic corulis mixtas inter confidimus ulmos?

Mo. Tu major: tibi me est æquum parere, Menalca:  
Sive sub incertas Zephyris mutantibus umbras,  
Sive antro potius succedimus: adspice, ut antrum  
Silvestris raris sparsit labrusca racemis. 7

ME. Montibus in nostris solus tibi certet Amyntas.

Mo. Quid si idem certet Phoebum superare canendo?

ME. Incipe, Mopse, prior: si quos aut Phyllidis ignes,



BUCOLICA. 19

Aut Alconis habes laudes, aut jurgia Codri. 11

Incipe: pascentis servabit Tityrus hædos.

Mo. Immo hæc, in viridi nuper quæ cortice fagi  
Carmina descripsi, & modulans alterna notavi,

Experiar: tu deinde jubeto certet Amyntas. 15

ME. Lenta salix quantum pallenti cedit oliuæ,

Puniceis humilis quantum saliuca rosetis:

Judicio nostro tantum tibi cedit Amyntas.

Mo. Sed tu desine plura, puer: successimus antro .

Extinctum nymphæ crudeli funere Daphnim 20

Flebant: vos coruli testes, & flumina, nymphis:

Quum, complexa sui corpus miserabile gnati,

Atque deos atque astra vocat crudelia mater.

Non ulli pastos illis egere diebus

Frigida, Daphni, boves ad flumina: nulla neq amnem

Libavit quadrupes, nec gramini attigit herbam. 26

Daphni, tuum Pœnos etiam ingemuisse leones

Interitum, montesque feri silvæque loquuntur.

Daphnis & Armenias curru subjungere tigris

Instituit, Daphnis thiasos inducere Bacchi, 30

Et foliis lentas intexere mollibus hastas .

Vitis ut arboribus decori est, ut vitibus uvæ,

Ut gregibus tauri, segetes ut pinguibus arvis;

Tu decus omne tuis. postquam te fata tulerunt,

Ipsa Pales agros, atque ipse reliquit Apollo. 35  
 Grandia sæpe quibus mandavimus hordea sulcis,  
 Infelix lolium, & steriles nascuntur avenæ.  
 Pro molli viola, pro purpureo narcisso,  
 Carduus & spinis surgit paliurus acutis.  
 Spargite humum foliis: inducite fontibus umbras,  
 Pastores: mandat fieri sibi talia Daphnis. 41  
 Et tumulum facite, & tumulo superaddite carmen:  
*Daphnis ego in silvis, hinc usque ad sidera notus,  
 Formosi pecoris custos, formosior ipse.*  
 ME. Tale tuum carmen nobis, divine poëta, 45  
 Quale sopor fessis in gramine: quale per æstum  
 Dulcis aquæ saliente sitim restinguere rivo.  
 Nec calamis solum æquiparas, sed voce magistrum.  
 Fortunate puer, tu nunc eris alter ab illo.  
 Nos tamen hæc quocunque modo tibi nostra vicissim  
 Dicemus: Daphninque tuum tollemus ad astra: 51  
 Daphnim ad astra feremus: amavit nos quoque Daphnis.  
 Mo. An quicquam nobis tali sit munere majus?  
 Et puer ipse fuit cantari dignus: & ista  
 Jam pridem Stimicon laudavit carmina nobis. 55  
 ME. Candidus infuetum miratur limen Olympi,  
 Sub pedibusque videt nubes & sidera Daphnis.  
 Ergo alacris silvas, & cetera rura voluptas,

Panaque, pastoresque tenet, Dryadasque puellas.  
 Nec lupus insidias pecori, nec retia cervis 60  
 Ulla dolum meditantur: amat bonus otia Daphnis.  
 Ipsi lætitia voces ad sidera jactant  
 Intonsi montes: ipsæ jam carmina rupes,  
 Ipsa sonant arbuta, Deus, Deus ille, Menalca.  
 Sis bonus ô felixque tuis! en quatuor aras: 65  
 Ecce duas tibi, Daphni, duas altaria Phœbo;  
 Pocula bina novo spumantia lacte quotannis,  
 Craterasque duo statuam tibi pinguis olivi:  
 Et multo in primis hilarans convivium Baccho,  
 Ante focum, si frigus erit, si messis, in umbra, 70  
 Vina novum fundam calathis Ariusia nectar.  
 Cantabunt mihi Damœtas & Lyctius Ægon:  
 Saltantis Satyros imitabitur Alphefibœus.  
 Hæc tibi semper erunt, & quum solemnia vota  
 Reddemus nymphis, & quum lustrabimus agros. 75  
 Dum juga montis aper, fluvios dum piscis amabit,  
 Dumque thymo pascentur apes, dum rore cicadæ,  
 Semper honos, nomenque tuum, laudesque manebunt.  
 Ut Baccho Cererique, tibi sic vota quotannis  
 Agricolaë facient: damnabis tu quoque votis. 80  
 Mo. Quæ tibi, quæ tali reddam pro carmine dona?  
 Nam neque me tantum venientis sibilus austru,

Nec percussa juvant fluctu tam litora, nec quæ  
Saxosâs inter decurrunt flumina valles.

ME. Hac te nos fragili donabimus ante cicuta. 85

Hæc nos, Formosum Corydon ardebat Alexin :

Hæc eadem docuit, Cujum pecus ? an Melibœi ?


MO. At tu sume pedû, quod, me quum læpe rogaret,

Non tulit Antigenes, (& erat tum dignus amari).

Formosum paribus nodis atque ære, Menalca. 90



*M. P. S.*





ECLOGA VI. SILENUS.  
 FAUNORUM, SATYRORUM  
 & SILVANORUM DELECTATIO.

**P**RIMA Syracosio dignata est ludere  
 versu,  
 Nostra, neque erubuit silvas habitare.  
 Thalia.

Quum canerem reges & praelia, Cynthus aurem  
 Vellit, & admonuit: Pastorem. Tityre, pinguis  
 Pascere oportet ovis, deductum dicere carmen. 5  
 Nunc ego (namque super tibi erunt, qui dicere laudes,  
 Vare, tuas cupiant, & tristia condere bella)  
 Agrestem tenui meditabor arundine Musam.  
 Non iniussa cano. si quis tamen hæc quoque, si quis  
 Captus amore leget; te nostræ, Vare, myricæ, 10  
 Te nemus omne canet: nec Phœbo gratior ulla est,

Quam sibi quæ Vari præscripsit pagina nomen.  
 Pergite, Pierides. Chromis & Mnasylos in antro  
 Silenum pueri somno videre jacentem,  
 Inflatum hesternis venas, ut semper, Iaccho: 15  
 Serta procul tantum capiti delapsa jacebant:  
 Et gravis adtrita pendebat cantharus ansa.  
 Adgressi (nam sæpe senex spe carminis ambo  
 Luferat) injiciunt ipsis ex vincula sertis.  
 Addit se sociam, timidisque supervenit Ægle: 20  
 Ægle, Naiadum pulcherrima: jamque videnti  
 Sanguineis frontem moris & tempora pingit.  
 Ille dolum ridens, quo vincula nectitis? inquit.  
 Solvite me, pueri: satis est potuisse videri.  
 Carmina, quæ vultis, cognoscite: carmina vobis; 25  
 Huic aliud mercedis erit: simul incipit ipse.  
 Tum vero in numerum Faunosq; ferasque videres  
 Ludere, tum rigidas motare cacumina quercus.  
 Nec tantum Phœbo gaudet Parnasia rupes:  
 Nec tantum Rhodope mirantur & Ismarus Orphea. 30  
 Namque canebat, uti magnum per inane coacta  
 Semina terrarumque, animæque, marisque fuissent,  
 Et liquidi simul ignis: ut his exordia primis  
 Omnia, & ipse tener mundi concreverit orbis.  
 Tum durare solum, & discludere Nerea ponto 35  
 Cœperit, & rerum paulatim sumere formas.

Jamque novum terræ stupeant lucescere solem,  
 Altius atque cadant submotis nubibus imbres:  
 Incipiant silvæ quum primum surgere, quumque  
 Rara per ignotos errent animalia montis. 40  
 Hinc lapides Pyrrhæ jactos, Saturnia regna,  
 Caucasiasque refert volucres, furtumque Promethei.  
 His adjungit, Hylan nautæ quo fonte relictum  
 Clamassent: ut litus, Hyla, Hyla, omne sonaret.  
 Et fortunatam, si nunquam armenta fuissent, 45  
 Paliphaën nivei solatur amore juveni.  
 Ah, virgo infelix, quæ te dementia cepit?  
 Præcides inplerunt falsis mugitibus agros:  
 At non tam turpis pecudum tamen ulla secuta est  
 Concubitus, quamvis collo timuisset aratrum, 50  
 Et sæpe in levi quæfisset cornua fronte.  
 Ah, virgo infelix, tu nunc in montibus erras!  
 Ille, latus niveum molli fultus hyacintho,  
 Illic sub nigra pallentis ruminat herbas:  
 Aut aliquam in magno sequitur grege claudite nymphæ,  
 Dictææ nymphæ, nemorum jam claudite saltus: 56  
 Si qua forte ferant oculis sese obvia nostris  
 Errabunda bovis vestigia. forsitan illum  
 Aut herba captum viridi, aut armenta secutum;  
 Perducant aliquæ stabula ad Gortynia vaccæ. 60  
 Tum canit Hesperidum miratam mala puellam:



Tum Phaëtoniadas musco circumdat amaræ  
 Corticis, atque solo proceras erigit alnos.  
 Tum canit, errantem Permessi ad flumina Gallum  
 Aonas in montis ut duxerit una sororum: 65  
 Utque viro Phœbi chorus adsurrexerit omnis:  
 Ut Linus hæc illi divino carmine pastor,  
 Floribus atque apio crinis ornatus amaro,  
 Dixerit: Hos tibi dant calamos (en accipe) Musæ,  
 Ascraeo quos ante seni: quibus ille solebat 70  
 Cantando rigidas deducere montibus ornos.  
 His tibi Grynæi nemoris dicatur origo:  
 Ne quis sit lucus, quo se plus jactet Apollo.  
 Quid loquar aut Scyllam Nisi, quam fama secuta est,  
 Candida succinctam latrantibus inguina monstris 75  
 Dulichias vexasse rates, & gurgite in alto  
 (Ah!) timidos nautas canibus lacerasse marinis?  
 Aut ut mutatos Terei narraverit artus:  
 Quas illi Philomela dapes, quæ dona pararit?  
 Quo cursu deserta petiverit, & quibus ante 80  
 Infelix sua tecta supervolitaverit alis?  
 Omnia quæ, Phœbo quondam meditante, beatus  
 Audiit Eurotas, jussitque ediscere lauros,  
 Ille canit. pulsæ referunt ad sidera valles.  
 Cogere donec oves stabulis, numerumq; referre 85  
 Jussit, & invito processit vesper Olympo.



ECLOGA VII. MELIBOEÛS.

MELIBOEUS, CORYDON, THYRSIS.



ORTE sub arguta confederat ilice  
 Daphnis,  
 Compulerantque greges Corydon &  
 Thyrsis in unum;  
 Thyrsis oves, Corydon distentas lacte capellas.  
 Ambo florentes ætatibus, Arcades ambo,  
 Et cantare pares, & respondere parati. 5  
 Hic mihi, dum teneras defendo à frigore myrtos,  
 Vir gregis ipse caper deerraverat. atque ego Daphnim  
 Adspicio: ille ubi me contra videt: Ocius, inquit,  
 Huc ades, ô Melibœe: caper tibi salvus, & hædi.  
 Et, si quid cessare potes, requiesce sub umbra. 10  
 Huc ipsi potum venient per prata juvenci:  
 Hic viridis tenera prætexit arundine ripas

Mincius, eque sacra resonant examina quercu.  
 Quid facerē? neque ego Alcippen, nec Phyllida habebā,  
 Depulso à lacte domi quæ clauderet agnos: 15  
 Et certamen erat, Corydon cum Thyrside, magnum.  
 Posthabui tamen illorum mea seria ludo.  
 Alternis igitur contendere versibus ambo  
 Cœpere: alternos Musæ meminisse volebant.  
 Hos Corydon, illos referebat in ordine Thyrsis. 20  
 C. Nymphæ, noster amor, Libethrides, aut mihi carmen,  
 Quale meo Codro, concedite: proxima Phœbi  
 Versibus ille facit: aut, si non possumus omnes,  
 Hic arguta sacra pendebit fistula pinu.  
 T. Pastores, edera crescentem ornate poëtam, 25  
 Arcades, invidia rumpantur ut ilia Codro:  
 Aut, si ultra placitum laudarit, baccare frontem  
 Cingite, ne vati noceat mala lingua futuro.  
 C. Sætosæ caput hoc apri, tibi Delia, parvus  
 Et ramosa Mycon vivacis cornua cervi. 30  
 Si proprium hoc fuerit, levi de marmore tota  
 Puniceo stabis suras evincta cothurno.  
 T. Sinum lactis, & hæc te liba, Priape, quotannis  
 Expectare sat est: cultos es pauperis horti.  
 Nunc te marmoreum pro tempore fecimus: at tu, 35  
 Si factura gregem suppleverit, aureus esto.

C. Nerine Galatea; thymo mihi dulcior Hyblæ,  
 Candidior cygnis, edera formosior alba:  
 Quum primum pasti repetent præsepia tauri,  
 Si qua tui Corydonis habet te cura, venito. 40  
 T. Immo ego Sardois videar tibi amarior herbis,  
 Horridior rusco, projecta vilior alga;  
 Si mihi non hæc lux toto jam longior anno est.  
 Ite domum pasti, si quis pudor, ite juvenci.  
 C. Muscoli fontes, & somno mollior herba, 45  
 Et quæ vos rara viridis tegit arbutus umbra;  
 Sollitium pecori defendite, jam venit æstas  
 Torrida: jam læto turgent in palmite gemmæ.  
 T. Hic focus, & tædæ pingues, hic plurimus ignis  
 Semper, & adsidua postes fuligine nigri. 50  
 Hic tantum Boreæ curamus frigora, quantum  
 Aut numerum lupus, aut torrentia flumina ripas.  
 C. Stant & juniperi, & castaneæ hirsutæ:  
 Strata jacent passim sua quæque sub arbore poma.  
 Omnia nunc rident, at si formosus Alexis 55  
 Montibus his abeat, videas & flumina sicca.  
 T. Aret ager: vitio moriens litit aëris herba:  
 Liber pampineas invidit collibus umbras.  
 Phyllidis adventu nostræ nemus omne virebit:  
 Juppiter & læto descendet plurimus imbri. 60

C. Populus Alcidae gratissima, vitis Iaccho,  
 Formosae myrtus Veneri, sua laurea Phaebo.  
 Phyllis amat corulos: illas dum Phyllis amabit,  
 Nec myrtus vincet corulos, nec laurea Phaebi.  
 T. Fraxinus in silvis pulcherrima, pinus in hortis, 65  
 Populus in fluviis, abies in montibus altis:  
 Saepius at si me, Lycida formosae, revisas,  
 Fraxinus in silvis cedat tibi, pinus in hortis.  
 M. Haec memini, & victum frustra contendere Thyrsin.  
 Ex illo Corydon, Corydon est tempore nobis. 70



M.P.S.



## ECLOGA VIII. PHARMACEUTRIA.

DAMON, ALPHEBIBOEUUS.



ASTORUM Musam Damonis &  
 Alpheiboei,  
 Immemor herbarum quos est mirata  
 juvenca

Certantis, quorum stupefactae carmine Lynce;  
 Et mutata suos requierunt flumina cursus:  
 Damonis Musam dicemus & Alpheiboei. 5  
 Tu mihi, seu magni superas jam saxa Timavi,  
 Sive oram Illyrici legis æquoris; en erit unquam  
 Ille dies, mihi quum liceat tua dicere facta?  
 En erit, ut liceat totum mihi ferre per orbem  
 Sola Sophocleo tua carmina digna cothurno? 10  
 A te principium: tibi desinet. accipe iussis  
 Carmina coepta tuis: atque hanc sine tempora circū  
 Inter victrices ederam tibi serpere lauros.

Frigida vix cœlo noctis decesserat umbra,  
 Quum ros in tenera pecori gratissimus herba: 15  
 Incumbens tereti Damon sic cœpit olivæ.  
 D. Nascere, præq; diem veniens age, Lucifer, alnum.  
 Conjugis indigno Nisæ deceptus amore  
 Dum queror, & divos (quamquam nil testibus illis  
 Profeci) extrema moriens tamen adloquor hora.  
 Incipe Mænaios mecum, mea tibia, versus. 21  
 Mænalus argutumque nemus pinosque loquentis  
 Semper habet; semper pastorum ille audit amores,  
 Panaque, qui primus calamos non passus inertis.  
 Incipe Mænaios mecum, mea tibia, versus. 25  
 Mopso Nisæ datur. quid non speremus amantes?  
 Jungentur jam gryphes equis: ævoque sequenti  
 Cum canibus timidi venient ad pocula damæ.  
 Mopse, novas incide faces: tibi ducitur uxor.  
 Sparge, marite, nuces: tibi deserit Hesperus Octam.  
 Incipe Mænaios mecum, mea tibia, versus. 31  
 O digno conjuncta viro! dum despicias omnis,  
 Dumque tibi est odio mea fistula, dumque capellæ,  
 Hirsutumque supercilium, promissaque barba:  
 Nec curare deum credis mortalia quemquam. 35  
 Incipe Mænaios mecum, mea tibia, versus.  
 Sepibus in nostris parvam te roscida mala

(Dux ego vester eram) vidi cum matre legentem.  
 Alter ab undecimo tum me jam ceperat annus:  
 Jam fragilis poteram à terra contingere ramos.  
 Ut vidi, ut perii, ut me malus abstulit error! 41  
 Incipe Mænaios mecum, mea tibia, versus.  
 Nunc scio, quid sit Amor. duris in cotibus illum  
 Aut Tmaros, aut Rhodope, aut extremi Garamantes,  
 Nec generis nostri puerum nec sanguinis edunt. 45  
 Incipe Mænaios mecum, mea tibia, versus.  
 Sævus Amor docuit gnatorum sanguine matrem  
 Commaculare manus. crudelis tu quoque, mater;  
 Crudelis mater magis, an puer improbus ille?  
 Improbus ille puer: crudelis tu quoque, mater. 50  
 Incipe Mænaios mecum, mea tibia, versus.  
 Nunc & ovis ultro fugiat lupus: aurea dura  
 Mala ferant quercus: narcisso floreat alnus:  
 Pingua corticibus sudent electra myricæ:  
 Certent & cycnis ululæ: sit Tityrus Orpheus: 55  
 Orpheus in silvis, inter Delphinas Arion.  
 Incipe Mænaios mecum, mea tibia, versus.  
 Omnia vel medium fiant mare: vivite silvæ.  
 Præceps acrii specula de montis in undas  
 Deferar. extremum hoc munus morientis habeto.  
 Desine, Mænaios jam desine, tibia, versus. 61

Hæc Damon: vos, quæ responderit Alpheibœus,  
 Dicite, Pierides. non omnia possumus omnes.  
 A. Effert aquam, & molli cinge hæc altaria vitta:  
 Verbenasque adole pinguis & mascula tura: 65  
 Conjugis ut magicis sanos avertere sacris  
 Experiar sensus. nihil hic nisi carmina defunt.  
 Ducite ab urbe domum, mea carmina, ducite Daphnim.  
 Carmina vel cœlo possunt deducere Lunam:  
 Carminibus Circe socios mutavit Ulixi: 70  
 Frigidus in pratis cantando rumpitur anguis.  
 Ducite ab urbe domum, mea carmina, ducite Daphnim.  
 Terna tibi hæc primum triplici diversa colore  
 Licia circumdo, terque hæc altaria circum  
 Effigiem duco. numero deus impare gaudet. 75  
 Ducite ab urbe domum, mea carmina, ducite Daphnim.  
 Necte tribus nodis ternos, Amarylli, colores:  
 Necte, Amarylli, modo: & Veneris, dic, vincula necto.  
 Ducite ab urbe domum, mea carmina, ducite Daphnim.  
 Limus ut hic durefcit, & hæc ut cera liquefcit 80  
 Uno eodemque igni; sic nostro Daphnis amore.  
 Sparge molam, & fragilis incende bitumine lauros.  
 Daphnis me malus urit: ego hanc in Daphnide laurum.  
 Ducite ab urbe domum, mea carmina, ducite Daphnim.  
 Talis amor Daphnim, qualis quum fessa juvencum 85

Per nemora atque altos quarendo bucula lucos  
 Propter aquæ rivum viridi procumbit in ulva  
 Perdita, nec seræ meminit decedere nocti:  
 Talis amor teneat, nec sit mihi cura mederi.  
 Ducite ab urbe domum, mea carmina, ducite Daphnim.  
 Has olim exuvias mihi perfidus ille reliquit, 91  
 Pignora cara sui: quæ nunc ego limine in ipso,  
 Terra, tibi mando. debent hæc pignora Daphnim.  
 Ducite ab urbe domum, mea carmina, ducite Daphnim.  
 Has herbas, atque hæc Ponto mihi lecta venena, 95  
 Ipse dedit Mœris. nascuntur plurima Ponto.  
 His ego sæpe lupum fieri, & se condere silvis  
 Mœrim, sæpe animas imis excire sepulcris,  
 Atque satas alio vidi traducere messis.  
 Ducite ab urbe domum, mea carmina, ducite Daphnim.  
 Fer cineres, Amarylli, foras: rivoque fluenti, 101  
 Transque caput jace: ne respexeris. his ego Daphnim  
 Adgrediar, nihil ille deos, nil carmina curat.  
 Ducite ab urbe domum, mea carmina, ducite Daphnim.  
 Adspice: corripuit tremulis altaria flammis 105  
 Sponte sua, dum ferre moror, cinis ipse. bonum sit!  
 Nescio quid certe est: & Hylax in limine latrat.  
 Credimus? an, qui amant, ipsi sibi somnia fingunt?  
 Parcite, ab urbe venit, jam parcite, carmina, Daphnis.



ECLOGA IX. MOERIS.

LYCIDAS, MOERIS,



UO te, Mœri, pedes? an, quo via  
ducit, in urbem?

M. O Lycida, vivi pervenimus;  
advena nostri,

Quod numquam veriti sumus, ut possessor agelli  
Diceret: Hæc mea sunt: veteres migrate coloni.  
Nunc victi, tristes, quoniam Fors omnia versat, 5  
Hos illi (quod nec bene vertat) mittimus hædos.  
L. Certe equidem audieram, qua se subducere colles  
Incipiunt, mollique jugum demittere clivo,  
Usque ad aquã, & veteres jam fracta cacumina, fagos,  
Omnia carminibus vestrum servasse Menalcan, 10  
M. Audieras; & fama fuit. Sed carmina tantum

Nostra valent, Lycida, tela inter Martia, quantum  
Chaonias dicunt, aquila veniente, columbas.  
Quod nisi me quacumque novas incidere litis  
Ante sinistra cava monuisset ab ilice cornix, 15  
Nec tuus hic Mœris, nec viveret ipse Menalcas.  
L. Heu! cadit in quemquã tantũ scelus? heu tua nobis  
Pæne simul tecum solatia rapta, Menalca! [herbis  
Quis caneret nymphas? quis humum florentibus  
Spargeret? aut viridi fontis induceret umbra? 20  
Vel quæ sublegi tacitus tibi carmina nuper,  
Quum te ad delicias ferres, Amaryllida, nostras?  
Tityre, dum redeo (brevis est via) pascæ capellas:  
Et potum pascas age, Tityre: & inter agendum  
Occurrere capro, cornu ferit ille, caveto. 25  
M. Immo hæc, quæ Varo nec dum perfecta canebat  
Vare, tuum nomen (superet modo Mantua nobis,  
Mantua væ miseræ nimium vicina Cremonæ!)  
Cantantes sublime ferent ad sidera cycni.  
L. Sic tua Cyrneas fugiant examina taxos: 30  
Sic cytho pascæ distendant ubera vaccæ.  
Incipe, si quid habes. & me fecere poëtam  
Pierides: sunt & mihi carmina. me quoq; dicunt  
Vatem pastores: sed non ego credulus illis.  
Nam neq; adhuc Varo videor, nec dicere Cinna 35

Digna, sed argutos interstrepere anser olores.  
 M. Id quidē ago; & tacitus, Lycida, mecū ipse voluto,  
 Si valeam meminisse: neque est ignobile carmen.  
 Huc ades, ô Galatea. quis est nam ludus in undis?  
 Hic ver purpureum: varios hîc flumina circum 40  
 Fundit humus flores: hîc cādida populus antro  
 Imminet, & lentæ texunt umbracula vites.  
 Huc ades: insani feriant sine litora fluctus.  
 L. Quid, quæ te pura solum sub nocte canentem  
 Audieram? numeros memini, si verba tenerem. 45  
 M. Daphni, quid antiquos signorum suspicis ortus?  
 Ecce Dionæi processit Cæsaris astrum:  
 Astrum, quo segetes gauderent frugibus: & quo  
 Duceret apricis in collibus uva colorem.  
 Insere, Daphni, puros: carpent tua poma nepotes. 50  
 Omnia fert ætas, animum quoque. sæpe ego longos  
 Cantando puerum memini me condere soles.  
 Nunc oblita mihi tot carmina. vox quoque Mœrim  
 Jam fugit ipsa: lupi Mœrim videre priores.  
 Sed tamen ista satis referet tibi sæpe Menalcas. 55  
 L. Causando nostros in longum ducis amores.  
 Et nunc omne tibi stratum filet æquor: & omnes  
 (Adspice) ventosi ceciderunt murmuris auræ.  
 Hinc adeo media est nobis via: namque sepulcrum

Incipit adparere Bianoris. hîc, ubi densas 60  
 Agricolæ stringunt frondes, hîc, Mœri, canamus:  
 Hic hædos depone. tamen veniemus in urbem.  
 Aut, si, nox pluviam ne colligat ante, veremur,  
 Cantantes licet usque (minus via lædat) eamus.  
 Cantantes ut eamus, ego hoc te falce levabo. 65  
 M. Desine plura, puer: & quod nunc instat, agamus.  
 Carmina tum melius, cum venerit ipse, canemus.



M.P.f.



ECLOGA X. GALLUS.



EXTREMUM hunc, Arethusa, mihi  
concede laborem.

Pauca meo Gallo, sed quæ legat ipsa  
Lycoris,

Carmina sunt dicenda. neget quis carmina Gallo?  
Sic tibi, quum fluctus subter labere Sicanos,  
Doris amara suam non intermisceat undam. 5  
Incipe. sollicitos Galli dicamus amores,  
Dum tenera adtondent simæ virgulta capellæ.  
Non canimus surdis: respondent omnia silvæ.  
Quæ nemora, aut qui vos saltus habuere, puellæ  
Naiðes, indigno quum Gallus amore periret? 10  
Nam neque Parnasi vobis juga, nam neque Pindi  
Ulla moram fecere, neque Aoniæ Aganippæ.  
Illum etiam lauri, etiam flevere myricæ:  
Pinifer illum etiam sola sub rupe jacentem

Mænalus, & gelidi fleverunt saxa Lycæi. 15  
Stant & oves circum: nostri nec pœnitent illas:  
Nec te pœniteat pecoris, divine poëta:  
Et formosus oves ad flumina pavit Adonis.  
Venit & upilio: tardi venere bubulci:  
Uvidus hiberna venit de glande Menalcas. 20  
Omnes, unde amor iste, rogant, tibi? venit Apollo:  
Galle, quid insanis? inquit, tua cura Lycoris  
Perque nives alium, perque horrida castra secuta est.  
Venit & agresti capitis Silvanus honore,  
Florentis ferulas & grandia lilia quassans. 25  
Pan deus Arcadiæ venit: quem vidimus ipsi  
Sanguineis ebuli baccis minioque rubentem.  
Ecquis erit modus? inquit. amor non talia curat.  
Nec lacrimis crudelis amor, nec gramina rivis,  
Nec cytilo saturantur apes, nec fronde capellæ. 30  
Tristis at ille. Tamen cantabitis, Arcades, inquit,  
Montibus hæc vestris: soli cantare periti  
Arcades. ô mihi tum quam molliter ossa quiescant,  
Vestra meos olim si fistula dicat amores!  
Atque utinam ex vobis unus, vestrique fuisset 35  
Aut custos gregis, aut maturæ vinitor uvæ!  
Certe sive mihi Phyllis, sive esset Amyntas,  
Seu quicumque furor, (quid tum, si fuscus Amyntas?



Et nigræ violæ sunt, & vaccinia nigra )  
 Mecum inter salices lenta sub vite jaceret. 40  
 Serta mihi Phyllis legeret, cantaret Amyntas.  
 Hic gelidi fontes: hic mollia prata, Lycori:  
 Hic nemus: hic ipso tecum consumerer ævo.  
 Nunc infans amor duri me Martis in armis,  
 Tela inter media, atque adversos detinet hostis. 45  
 Tu procul à patria (nec sit mihi credere) tantum  
 Alpinas, ah dura, nives & frigora Rheni  
 Me sine sola vides: ah te ne frigora lædant!  
 Ah tibi ne teneras glacies secet aspera plantas!  
 Ibo, & Chalcidico quæ sunt mihi condita versu 50  
 Carmina, pastoris Siculi modulabor avena.  
 Certum est in silvis, inter spelæa ferarum,  
 Malle pati, tenerisque meos incidere amores  
 Arboribus: crescent illæ: crescetis amores.  
 Interea mixtis lustrabo Mænala nymphis: 55  
 Aut acris venabor apros. non me ulla vetabunt  
 Frigora Parthenios canibus circumdare saltus.  
 Jam mihi per rupes videor lucosque sonantis  
 Ire: libet Partho torquere Cydonia cornu  
 Spicula; tanquam hæc sint nostri medicina furoris,  
 Aut deus ille malis hominum mitescere discat. 61  
 Jam neque Hamadryades rursum, nec carmina nobis


Ipsa placent: ipsæ rursum concedite silvæ.  
 Non illum nostri possunt mutare labores:  
 Nec si frigoribus mediis Hebrumque bibamus, 65  
 Sithoniasque nives hiemis subeamus aquosæ,  
 Nec si, quum moriens alta liber aret in ulmo,  
 Æthiopum versemus ovis sub sidere Cancri.  
 Omnia vincit amor: & nos cedamus Amori.  
 Hæc sat erit, divæ, vestrum cecinisse poetam, 70  
 Dum sedet, & gracili fiscellam texit hibisco,  
 Pierides. vos hæc facietis maxima Gallo:  
 Gallo, cujus amor tantum mihi crescit in horas,  
 Quantum vere novo viridis se subjicit alnus.  
 Surgamus: solet esse gravis cantantibus umbra. 75  
 Juniperi gravis umbra: nocent & frugibus umbra.  
 Ite domum saturæ, venit Hesperus, ite capellæ.




M.P.f.



M. Pitteri sc. ven.









P. VIRGILII MARONIS  
**GEORGICON**  
 LIBER PRIMUS.  
 AD C. CILNIUM MÆCENATEM.



UID faciat lætas segetes, quo si-  
 dere terram  
 Vertere, Mæcenas, ulmisque adjun-  
 gere vites

Conveniat: quæ cura boum, qui cultus habendo  
 Sit pecori, apibus quanta experientia parcis,  
 Hinc canere incipiam. Vos, ô clarissima mundi 5  
 Lumina, labentem cælo quæ ducitis annum,  
 Liber, & alma Ceres; vestro si munere tellus  
 Chaoniam pingui glandem mutavit arista,  
 Poculaque inventis Acheloia miscuit uvis:  
 Et vos, agrestum præsentia numina, Fauni, 10

Ferte simul Fauniquæ pedem Dryadesque puellæ :  
 Munera vestra cano. tuque ô, cui prima frementem  
 Fudit equum, magno tellus percussa tridenti,  
 Neptune: & cultor nemorum, cui pingua Cææ  
 Tër centum nivei tondent dumeta juvenci : 15  
 Ipse nemus linquens patrium saltusque Lycei,  
 Pan ovium custos, tua si tibi Mænala curæ,  
 Adlis ô Tegææ favens, oleæque Minerva  
 Inventrix, unciq; puer monstrator aratri,  
 Et teneram ab radice ferens, Silvane, cupressum : 20  
 Dique deæque omnes, studium quibus arva tueri,  
 Quique novas alitis non ullo semine fruges :  
 Quique satis largum cælo demittitis imbrem.  
 Tuque adeo, quem mox quæ sint habitura deorum  
 Concilia, incertum est; urbisne invisere, Cæsar, 25  
 Terrarumque velis curam: & te maximus orbis  
 Auctorem frugum tempestatumque potentem  
 Adcipiat, cingens materna tempora myrto;  
 An deus immensi venias maris, ac tua nautæ  
 Numina sola colant: tibi serviat ultima Thule: 30  
 Teque sibi generum Tethys emat omnibus undis:  
 Anne novum tardis sidus te mensibus addas,  
 Qua locus Erigonen inter Chelæque sequentis  
 Panditur. ipse tibi jam brachia contrahit ardens

Scorpis, & cæli justa plus parte relinquit. 35  
 Quidquid eris; (nam te nec sperent Tartara regem,  
 Nec tibi regnandi veniat tam dira cupido:  
 Quamvis Elyfios miretur Græcia campos,  
 Nec repetita sequi curet Proserpina matrem)  
 Da facilem cursum, atque audacibus adnue cceptis, 40  
 Ignarosque viæ mecum miseratus agrestis  
 Ingredere, & votis jam nunc advesce vocari.  
 Vere novo, gelidus canis quum montibus humor  
 Liquitur, & zephyro putris se gleba resolvit;  
 Depresso incipiat jam tum mihi taurus aratro 45  
 Ingemere, & sulco adtritum splendescere vomer.  
 Illa seges demum votis respondet avari  
 Agricolæ, bis quæ solem, bis frigora sensit:  
 Illius immensæ ruperunt horrea messes.  
 At prius ignotum ferro quam scindimus æquor, 50  
 Ventos, & varium cæli prædiscere morem  
 Cura sit, ac patrios cultusque habitusque locorum:  
 Et quid quæque ferat regio, & quid quæque recuset.  
 Hic segetes, illic veniunt felicius uvæ:  
 Arborei fetus alibi, atque injussa virefcunt 55  
 Gramina. nonne vides, croceos ut Imolus odores,  
 India mittit ebur, molles sua tura Sabæi?  
 At Chalybes nudi ferrum, virofaque Pontus

Castorea, Eliadum palmas Epiros equarum?  
 Continuo has leges, æternaque fœdera certis 60  
 Inposuit Natura locis: quo tempore primum  
 Deucalion vacuum lapides jactavit in orbem:  
 Unde homines nati, durum genus. ergo age, terræ  
 Pingue solum primis extemplo à mensibus anni  
 Fortes invortant tauri, glebasque jacentis 65  
 Pulverulenta coquat maturis solibus æstas.  
 At si non fuerit tellus fecunda, sub ipsum  
 Arcturum tenui sat erit suspendere sulco:  
 Illic, officiant lætis ne frugibus herbæ:  
 Hic, sterilem exiguus ne deserat humor arenam. 70  
 Alternis idem tonsas cessare novalis,  
 Et segnem patiēre situ durefcere campum.  
 Aut ibi flava serēs, mutato sidere, farra,  
 Unde prius lætum siliqua quassante legumen,  
 Aut tenuis fœtus viciæ, tristisque lupini 75  
 Sustuleris fragiles calamos, silvamque sonantem.  
 Urit enim lini campum seges, urit avenæ:  
 Urunt Lethæo perfusa papavera somno.  
 Sed tamen alternis facilis labor: arida tantum  
 Ne saturare fimo pingui pudeat sola; neve 80  
 Effcetos cinerem immundum jactare per agros.  
 Sic quoque mutatis requiescunt fœtibus arva.

Nec nulla interea est inaratæ gratia terræ.  
 Sæpe etiam sterilis incendere profuit agros,  
 Atque levem stipulam crepitantibus urere flammis: 85  
 Sive inde occultas vires, & pabula terræ  
 Pingua concipiunt: sive illis omne per ignem  
 Excoquitur vitium, atque exsudat inutilis humor:  
 Seu pluris calor ille vias & cæca relaxat  
 Spiramenta, novas veniat qua succus in herbas: 90  
 Seu durat magis, & venas adstringit hiantis:  
 Ne tenues pluviae, rapidive potentia solis  
 Acrior, aut Boreæ penetrabile frigus adurat.  
 Multum adeo, rastris glebas qui frangit inertis,  
 Vimineasque trahit crates, juvat arva: neque illum 95  
 Flava Ceres alto nequidquam spectat Olympo:  
 Et qui, profcillo quæ suscitât æquore terga,  
 Rursus in obliquom verso perrumpit aratro,  
 Exercetque frequens tellurem, atque imperat arvis.  
 Humida solstitia atque hiemes orate serenas, 100  
 Agricola: hiberno lætissima pulvere farra,  
 Lætus ager. nullo tantum se Myfia cultu  
 Jactat, & ipsa suas mirantur Gargara mellis.  
 Quid dicam, jacto qui semine comminus arva  
 Insequitur, cumulosque ruit male pinguis arenæ? 105  
 Deinde satis fluvium inducit, rivolque sequentis?



Et, quum exustus ager morientibus æstuat herbis,  
 Ecce supercilio clivosi tramitis undam  
 Elicit: illa cadens raucum per levia murmur  
 Saxa ciet, scatebrisque arentia temperat arva. 110  
 Quid, qui, ne gravidis procumbat culmus aristas,  
 Luxuriam segetum tenera depascit in herba,  
 Quum primum sulcos æquant fata? quique paludis  
 Collectum humorem bibula deducit arena?  
 Præsertim incertis si mensibus annis abundans 115  
 Exit, & obducto late tenet omnia limo:  
 Unde cavæ tepido sudant humore lacunæ.  
 Nec tamen (hæc quum sint hominumque boumque labores  
 Versando terram experti) nihil improbus anser,  
 Strymoniaëque grues, & amaris intuba fibris, 120  
 Officiunt, aut umbra nocet. pater ipse colendi  
 Haud facilem esse viam voluit, primusque per artem  
 Movit agros, curis acuens mortalia corda:  
 Nec torpere gravi passus sua regna veterno.  
 Ante Jovem nulli subigebant arva coloni: 125  
 Nec signare quidem aut partiri limite campum  
 Fas erat: in medium quærebant: ipsaque tellus  
 Omnia liberius, nullo poscente, ferebat.  
 Ille malum virus serpentibus addidit atris,  
 Prædarique lupos iussit, pontumque moveri: 130

Mellaque decussit foliis, ignemque removit,  
 Et passim rivis currentia vina repressit:  
 Ut varias usus meditando extunderet artis  
 Paullatim, & sulcis frumenti quæreret herbam:  
 Ut silicis venis abstrusum excuderet ignem. 135  
 Tunc alnos primum fluvii sensere cavatas:  
 Navita tum stellis numeros & nomina fecit,  
 Pleiadas, Hyadas, claramque Lycaonis Arcton.  
 Tum laqueis captare feras, & fallere visco,  
 Inventum: & magnos canibus circumdare saltus. 140  
 Atque alius latum funda jam verberat amnem,  
 Alta petens: pelagoque alius trahit humida lina.  
 Tum ferri rigor, atque argutæ lamina ferræ:  
 (Nam primi cuneis scindebant fissile lignum)  
 Tum variæ venere artes. labor omnia vicit 145  
 Inprobus, & duris urguens in rebus egestas.  
 Prima Ceres ferro mortalis vertere terram  
 Instituit: quum jam glandes atque arbuta sacrae  
 Deficerent silvæ, & victum Dodona negaret.  
 Mox & frumentis labor additus: ut mala culmos 150  
 Effet robigo, segnisque horreret in arvis  
 Carduus. intereunt segetes: subit aspera silva,  
 Lappæque tribulique: interque nitentia culta  
 Infelix lolium & steriles dominantur avenæ.

Quod nisi & adliduis terram insectabere rastris, 155  
 Et sonitu terrebis aves, & ruris opaci  
 Falce premes umbras, votisque vocaveris imbrem:  
 Heu, magnum alterius frustra spectabis acervum:  
 Concussa que famem in silvis solabere quercu.  
 Dicendum, & quæ sint duris agrestibus arma: 160  
 Quis sine nec potuere seri, nec surgere messes:  
 Vomis, & inflexi primum grave robur aratri,  
 Tarda que Eleulinæ matris volventia plaustra,  
 Tribula que, traheæ que, & iniquo pondere rastris:  
 Virgæ præterea Celei vilisque supellex, 165  
 Arbutæ crates, & mystica vannus lacchi.  
 Omnia quæ multo ante memor provisâ repones;  
 Si te digna manet divini gloria ruris.  
 Continuo in silvis magna vi flexa domatur  
 In burim, & curvi formam accipit ulmus aratri. 170  
 Huic à stirpe pedes temo protentus in octo,  
 Binæ aures, duplici aptantur dentalia dorso:  
 Cæditur & tilia ante jugo levis, alta que fagus,  
 Stiva que, quæ currus à tergo torqueat imos;  
 Et suspensâ focus explorat robora fumus. 175  
 Possum multa tibi veterum præcepta referre;  
 Ni refugis, tenuisque piget cognoscere curas.  
 Area cum primis ingenti æquanda cylindro,

Et vertenda manu, & creta solidanda tenaci:  
 Ne subeant herbæ, neu pulvere victa fatiscat; 180  
 Tum variæ inludant pestes. sæpe exiguus mus  
 Sub terris posuitque domos atque horrea fecit:  
 Aut oculis capti fodere cubilia talpæ.  
 Inventusque cavis bufo, & quæ plurima terræ  
 Monstra ferunt populatque ingentem farris acervum  
 Curculio, atque inopi metuens formica senectæ. 186  
 Contemplator item, quum se nux plurima silvis  
 Induet in florem, & ramos curvabit olentis:  
 Si superant foetus, pariter frumenta sequentur,  
 Magnaque cum magno veniet tritura calore. 190  
 At si luxuriâ foliorum exuberat umbra,  
 Nequidquam pinguis paleâ teret area culmos.  
 Semina vidi equidem multos medicare serentes,  
 Et nitro prius, & nigra perfundere amurca,  
 Grandior ut foetus filiquis fallacibus esset. 195  
 Et, quamvis igni exiguo properata maderent,  
 Vidi lecta diu, & multo spectata labore,  
 Degenerare tamen: ni vis humana quotannis  
 Maxuma quæque manu legeret: sic omnia fatis  
 In pejus ruere, ac retro sublapsa referri. 200  
 Non aliter, quam qui adverfo vix flumine lembum  
 Remigiis subigit, si brachia forte remifit,

Atque illum in præceps pronò rapit alveus anni.  
 Præterea tam sunt Arcturi sidera nobis,  
 Hædorumque dies servandi, & lucidus Anguis, 205  
 Quam quibus in patriam ventosa per æquora vectis  
 Pontus & ostriferi fauces tentantur Abydi.  
 Libra die somnique pares ubi fecerit horas,  
 Et medium luci atque umbris jam dividit orbem:  
 Exercete, viri, tauros: serite hordea campis, 210  
 Usque sub extremum brumæ intractabilis imbrem.  
 Nec non & lini segetem, & Cereale papaver,  
 Tempus humo tegere, & jamdudum incumbere aratris:  
 Dum sicca tellure licet, dum nubila pendent.  
 Vere fabis satio: tum te quoque, Medica, putres 215  
 Adcipiunt fulci; & milio venit annua cura:  
 Candidus auratis aperit quum cornibus annum  
 Taurus, & averso cedens Canis occidit astro.  
 At si triticeam in messem robustaque farra  
 Exercebis humum, solisque instabis aristis: 220  
 Ante tibi Eoæ atlantides abscondantur,  
 Gnosiaque ardentis decedat stella Coronæ,  
 Debita quam fulcis committas semina, quamque  
 Invitæ properes anni spem credere terræ.  
 Multi ante occasum Majæ cœpere: sed illos 225  
 Expectata seges vanis elusit aristis.

Si vero viciamque seres, vilemque faselum,  
 Nec Pelusiacæ curam adspernabere lentis;  
 Haud obscura cadens mittet tibi signa Bootes.  
 Incipe, & ad medias sementem extende pruinas. 230  
 Idcirco certis dimensum partibus orbem  
 Per duodena regit mundi sol aureus astra.  
 Quinque tenent cœlum zonæ; quarum una corusco  
 Semper sole rubens, & torrida semper ab igni:  
 Quam circum extremæ dextra lævaque trahuntur, 235  
 Cærulea glacie concretæ atque imbribus atris.  
 Has inter medianque duæ mortalibus ægris  
 Munere concessæ divûm. via secta per ambas,  
 Obliquus qua se signorum verteret ordo.  
 Mundus ut ad Scythiam Rhipæasque arduus arcis 240  
 Confurgit, premitur Libyæ devexus in austrum.  
 Hic vertex nobis semper sublimis: at illum  
 Sub pedibus Styx atra videt, Manesque profundi:  
 Maxumus hic flexu sinuoso elabitur anguis  
 Circum, perque duas in morem fluminis Arctos, 245  
 Arctos Oceani metuentis æquore tingui.  
 Illic, ut perhibent, aut intempesta filet nox  
 Semper, & obtenta densantur nocte tenebræ:  
 Aut redit à nobis Aurora, diemque reducit:  
 Nosque ubi primus equis Oriens adflavit anhelis, 250

Illic fera rubens adscendit lumina Vesper.  
 Hinc tempestates dubio prædiscere cœlo  
 Possumus, hinc mellisque diem, tempusque serendi;  
 Et quando infidum remis inpellere marmor  
 Conveniat: quando armatas deducere classis, 255  
 Aut tempestivam silvis evertere pinum.  
 Nec frustra signorum obitus speculamur & ortus,  
 Temporibusque parem diversis quatuor annum.  
 Frigidus agricolam si quando continet imber,  
 Multa, forent quæ mox cœlo properanda sereno, 260  
 Maturare datur. durum procudit arator  
 Vomeris obtusi dentem: cavat arbore lintres:  
 Aut pecori lignum, aut numeros impressit acervis.  
 Exacuunt alii vallos, furcasque bicornis,  
 Atque Amerina parant lentæ retinacula viti. 265  
 Nunc facilis rubea texatur fiscina virga:  
 Nunc torrete igni fruges, nunc frangite saxo.  
 Quippe etiam festis quædam exercere diebus  
 Fas & jura sinunt. rivos deducere nulla  
 Religio vetuit, segeti prætere sepe, 270  
 Infidias avibus moliri, incendere vepres,  
 Balantumque gregem fluvio mersare salubri.  
 Sæpe oleo tardi costas agitator aselli,  
 Vilibus aut onerat pomis: lapidemque revertens

Incusum, aut atræ massam picis urbe reportat. 275  
 Ipsa dies alios alio dedit ordine Luna  
 Felices operum. quintam fuge: pallidus Orcus,  
 Eumenidesque satæ. tum partu terra nefando  
 Cœumque Iapetumque creat, sævumque Typhœa,  
 Et conjuratos cœlum rescindere fratres. 280  
 Ter sunt conati inponere Pelio Ossam  
 Scilicet, atque Ossæ frondosum involvere Olympum:  
 Ter pater exstructos disjecit fulmine montis.  
 Septima post decumam felix: & ponere vitem,  
 Et prensos domitare boves, & licia telæ 285  
 Addere. nona fugæ melior, contraria furtis.  
 Multa adeo gelida melius se nocte dedere,  
 Aut quum sole novo terras inrorat Eous.  
 Noctē leves melius stipulæ, nocte arida prata  
 Tondentur: noctes lentus non deficit humor. 290  
 Et quidam seros hiberni ad luminis ignes  
 Pervigilat, ferroque faces inspiciat acuto.  
 Interea, longum cantu solata laborem,  
 Arguto conjunx percurrit pectine telas:  
 Aut dulcis musti Volcano decoquit humorem, 295  
 Et foliis undam trepidi despumat aheni.  
 At rubicunda Ceres medio succiditur æstu:  
 Et medio tostas æstu terit area fruges.

Nudus ara, sere nudus. Hiems ignava colono.  
 Frigoribus parto agricolæ plerumque fruuntur, 300  
 Mutuaque inter se læti convivia curant.  
 Invitat genialis hiems, curasque resolvit:  
 Ceu pressæ quum jam portum tetigere carinæ,  
 Puppibus & læti nautæ imposuere coronas.  
 Sed tamen & quernas glandes tum stringere tempus,  
 Et lauri baccas, oleamque, cruentaque myrta. 306  
 Tum gruibus pedicas & retia ponere cervis,  
 Auritosque sequi lepores: tum figere damas,  
 Stuppea torquentem Balearis verbera fundæ,  
 Quum nix alta jacet, glaciem quæ flumina trudent.  
 Quid tempestates autumnæ & sidera dicam? 311  
 Atque ubi jam breviorque dies, & mollior æstas,  
 Quæ vigilanda viris? vel quæ ruit imbriferæ ver:  
 Spicea jam campis quæ messis inhorruit, & quum  
 Frumenta in viridi stipula lactentia turgent? 315  
 Sæpe ego, quum flavis messorum induceret arvis  
 Agricola, & fragili jam stringeret hordea culmo,  
 Omnia ventorum concurrere prælia vidi:  
 Quæ gravidam late segetem ab radicibus imis  
 Sublime expulsam eruerent: ita turbine nigro 320  
 Ferret hiems culmumque levem stipulaeque volantis.  
 Sæpe etiam inmensum cælo venit agmen aquarum,

Et cœdam glomerant tempestatem imbris atris  
 Collectæ ex alto nubes: ruit arduus æther,  
 Et pluvia ingenti sata læta boumque labores 325  
 Diluit: implentur fossæ, & cava flumina crescunt  
 Cum sonitu, fervetque fretis spirantibus æquor.  
 Ipse pater, media nimborum in nocte, coruscâ  
 Fulmina molitur dextra: quo maxuma motu  
 Terra tremit: fugere feræ: & mortalia corda 330  
 Per gentes humilis stravit pavor. ille flagranti  
 Aut Atho, aut Rhodopen, aut alta Ceraunia telo  
 Dejicit: ingeminant austri, & densissimus imber:  
 Nunc nemora ingenti vento, nunc littora plangunt.  
 Hoc metuens, cœli menses, & sidera serva. 335  
 Frigida Saturni sese quo stella receptet:  
 Quos ignis cœli Cyllenius erret in orbis.  
 In primis venerare deos, atque annua magnæ  
 Sacra refer Cereri, lætis operatus in herbis,  
 Extremæ sub casum hiemis, jam vere sereno. 340  
 Tunc pingues agni, & tunc mollissima vina:  
 Tunc somni dulces, densæque in montibus umbræ.  
 Cuncta tibi Cererem pubes agrestis adoret.  
 Cui tu lacte favos, & miti dilue Baccho:  
 Terque novas circum felix eat hostia fruges; 345  
 Omnis quam chorus & socii comitentur ovantes;

Et Cererem clamore vocent in tecta: neque ante  
 Falcem maturis quisquam supponat aristis,  
 Quam Cereri tortâ redimitus tempora quercu  
 Det motus incompósitos, & carmina dicat. 350  
 Atque hæc ut certis possimus discere signis,  
 Æstusque, pluvialisque, & agentis frigora ventos;  
 Ipse pater statuit, quid menstrua Luna moneret:  
 Quo signo caderent austris: quid sæpe videntes  
 Agricolæ, propius stabulis armenta tenerent. 355  
 Continuo ventis surgentibus, aut freta ponti  
 Incipiunt agitata tumescere, & aridus altis  
 Montibus audiri fragor: aut resonantia longè  
 Litora misceri, & nemorum increbescere murmur.  
 Jam sibi tum curvis male temperat unda carinis,  
 Quum medio celeres revolant ex æquore mergi, 361  
 Clamoremque ferunt ad litora: quumque marinæ  
 In sicco ludunt fulicæ: notasque paludes  
 Deserit, atque altam supra volat ardea nubem.  
 Sæpe etiam stellas, vento inpendente, videbis 365  
 Præcipites cælo labi, noctisque per umbram  
 Flammarum longos à tergo albescere tractus:  
 Sæpe levem paleam & frondes volitare caducas,  
 Aut summa nantis in aqua concludere plumas.  
 At Boreæ de parte trucis quum fulminat, & quum 370

Eurique zephyrique tonat domus; omnia plenis  
 Rura natant fossis, atque omnis navita ponto  
 Humida vela legit. numquam imprudentibus imber  
 Obfuit. aut illum surgentem vallibus imis  
 Aëriæ fugere grues: aut bucula cælum 375  
 Suspiciens patulis captavit naribus auras:  
 Aut arguta lacus circumvolitavit hirundo:  
 Et veterem in limo ranæ cecinere querelam.  
 Sæpius & tectis penetralibus extulit ova  
 Angustum formica terens iter: & bibit ingens 380  
 Arcus: & è pastu decedens agmine magno  
 Corvorum increpuit densis exercitus alis.  
 Jam varias pelagi volucres, & quæ Asia circum  
 Dulcibus in stagnis rimantur prata Caystri,  
 Certatim largos humeris infundere rores; 385  
 Nunc caput objectare fretis, nunc currere in undas,  
 Et studio incassum videas gestire lavandi.  
 Tum cornix plena pluviam vocat improba voce,  
 Et sola in sicca secum spatatur arena.  
 Nec nocturna quidem carpentes pensa puellæ 390  
 Nescivere hiemem: testa quum ardente viderent  
 Scintillare oleum, & putris concreescere fungos.  
 Nec minus ex imbri soles & aperta serena  
 Prospicere, & certis poteris cognoscere signis:

Nam neque tum stellis acies obtusa videtur; 395  
 Nec fratris radiis obnoxia surgere Luna;  
 Tenuia nec lanæ per coelum vellera ferri.  
 Non tepidum ad solem pennas in litore pandunt  
 Dilectæ Thetidi Alcyones: non ore solutos  
 Inmundi meminere suos jactare maniplos. 400  
 At nebulae magis ima petunt, campoque recumbunt:  
 Solis & occasum fervans de culmine summo  
 Nequidquam seros exercet noctua cantus.  
 Adparet liquido sublimis in aëre Nifus,  
 Et pro purpureo poenas dat Scylla capillo. 405  
 Quaecumque illa levem fugiens secat æthera pennis,  
 Ecce inimicus, atrox, magno stridore per auras  
 Insequitur Nifus: qua se fert Nifus ad auras,  
 Illa levem fugiens raptim secat æthera pennis.  
 Tum liquidas corvi presso ter gutture voces, 410  
 Aut quater, ingeminant: & sæpe cubilibus altis,  
 Nescio qua præter solitum dulcedine læti,  
 Inter se foliis strepitant: juvat imbribus actis  
 Progeniem parvam dulcisque revisere nidos.  
 Haud equidem credo, quia sit divinitus illis 415  
 Ingenium, aut rerum fato prudentia major.  
 Verum, ubi tempestas & coeli mobilis humor  
 Mutavere vias, & Juppiter uvidus austris

Denset, erant quæ rara modo, & quæ densa, relaxat;  
 Vertuntur species animorum, & pectora motus 420  
 Nunc alios, alios, dum nubila ventus agebat,  
 Concipiunt. hinc ille avium concentus in agris,  
 Et lætæ pecudes, & ovantes gutture corvi.  
 Si vero solem ad rapidum lunasque sequentis  
 Ordine respicies; numquam te craftina fallat 425  
 Hora, neque insidiis noctis capiere serenæ.  
 Luna revertentes quum primum conligit ignis,  
 Si nigrum obscuro comprehenderit aëra cornu,  
 Maxumus agricolis pelagoque parabitur imber.  
 At, si virgineum suffuderit ore ruborem, 430  
 Ventus erit: vento semper rubet aurea Phœbe.  
 Sin ortu quarto (namque is certissimus auctor)  
 Pura, neque obtusis per cælum cornibus ibit;  
 Totus & ille dies, & qui nascentur ab illo  
 Exactum ad mensem, pluvia ventisque carebunt: 435  
 Votaque servati solvent in litore nautæ  
 Glauco, & Panopææ, & Inoo Melicertæ.  
 Sol quoque & exoriens, & quum se condet in undas,  
 Signa dabit: solem certissima signa sequuntur,  
 Et quæ mane refert, & quæ surgentibus astris. 440  
 Ille ubi nascentem maculis variaverit ortum  
 Conditus in nubem, medioque refugerit orbe;

Suspecti tibi sint imbres: namque urguet ab alto  
 Arboribusque satisque Notus pecorique sinister.  
 Aut ubi sub lucem densa inter nubila sese 445  
 Diversi rumpent radii, aut ubi pallida surget  
 Tithoni croceum linquens Aurora cubile;  
 Heu, male tum mitis defendet pampinus uvas:  
 Tam multa in tectis crepitans salit horrida grando.  
 Hoc etiam, emenso quum jam decedet Olympo, 450  
 Profuerit meminisse magis: nam sæpe videmus  
 Ipsiùs in vultu varios errare colores.  
 Cæruleus pluviam denuntiat, igneus euros.  
 Sin maculæ incipient rutilo inmiscerier igni,  
 Omnia tunc pariter vento nimisque videbis 455  
 Fervere: non illa quisquam me nocte per altum  
 Ire, neque à terra moneat convellere funem.  
 At si, quum referetque diem, condetque relatum,  
 Lucidus orbis erit, frustra terreberè nimbis,  
 Et claro silvas cernes aquilone moveri. 460  
 Denique, quid vesper serus vehat, unde serenas  
 Ventus agat nubes, quid cogitet humidus auster,  
 Sol tibi signa dabit. solem quis dicere falsum  
 Audeat? ille etiam cæcos instare tumultus  
 Sæpe monet, fraudemque & operta tumescere bella.  
 Ille etiam extincto miseratus Cæsare Romam, 466

Quum caput obscura nitidum ferrugine texit,  
 Impiaque æternam timuerunt secula noctem.  
 Tempore quamquam illo tellus quoq; & æquora ponti,  
 Obscæniq; canes, inportunæque volucres 470  
 Signa dabant. quoties Cyclopum effervere in agros  
 Vidimus undantem ruptis fornacibus Ætnam,  
 Flammarumque globos, liquefactaque volvere saxa!  
 Armorum sonitum toto Germania cœlo  
 Audiit: insolitis tremuerunt motibus Alpes. 475  
 Vox quoque per lucos volgo exaudita silentis  
 Ingens: & simulacra modis pallentia miris  
 Visa sub obscurum noctis: pecudesque locutæ,  
 Infandum! sistunt amnes, terræque dehiscunt,  
 Et mœstum inlacrimat templis ebur, æraque sudant.  
 Proluit infano contorquens vortice silvas 481  
 Fluviorum rex Eridanus, camposque per omnis  
 Cum stabulis armenta tulit. nec tempore eodem  
 Tristibus aut extis fibræ adparere minaces,  
 Aut puteis manare cruor cessavit: & alte 485  
 Per noctem resonare, lupis ululantibus, urbes:  
 Non alias cœlo ceciderunt plura sereno  
 Fulgura: nec diri toties arsere cometæ.  
 Ergo inter sese paribus concurrere telis  
 Romanas acies iterum videre Philippi: 490



Nec fuit indignum superis, bis sanguine nostro  
 Emathiam, & latos Hæmi pinguescere campos.  
 Scilicet & tempus veniet, quum finibus illis  
 Agricola, incurvo terram molitus aratro,  
 Exesa inveniet scabra robigine pila: 495  
 Aut gravibus rastris galeas pulsabit inanis:  
 Grandiaque effollis mirabitur ossa sepulcris.  
 Di patrii Indigetes, & Romule, Vestaque mater,  
 Quæ Tuscum Tiberim, & Romana Palatia servas,  
 Hunc saltem everso juvenem succurrere seculo 500  
 Ne prohibete. satis jam pridem sanguine nostro  
 Laomedontæ luimus perjuria Trojæ.  
 Jam pridem nobis cœli te regia, Cæsar,  
 Invidet, atque hominum queritur curare triumphos.  
 Quippe ubi fas versus atq; nefas: tot bella per orbem: 505  
 Tam multæ scelerum facies: non ullus aratro  
 Dignus honos: squalent abductis arva colonis,  
 Et curvæ rigidum falces conflantur in enses.  
 Hinc movet Euphrates, illinc Germania bellum:  
 Vicinæ ruptis inter se legibus urbes 510  
 Arma ferunt: sævit toto Mars inpius orbe.  
 Ut, quum carceribus sese effudere quadrigæ,  
 Addunt in spatia, & frustra retinacula tendens  
 Fertur equis auriga, neque audit currus habenas.



## GEORGICON LIBER II.



ACTENUS arborum cultus, & sidera  
 cœli:

Nunc te, Bacche, canam, nec non sil-  
 vestria tecum

Virgulta, & prolem tarde crescentis olivæ.  
 Huc, pater ô Lenæe, (tuis hic omnia plena  
 Muneribus: tibi pampineo gravidus autumnno 5  
 Floret ager; spumat plenis vindemia labris)  
 Huc, pater ô Lenæe, veni; nudataque musto  
 Tingue novo mecum dereptis crura cothurnis.  
 Principio arboribus varia est natura creandis:  
 Namque aliæ, nullis hominum cogentibus, ipsæ 10  
 Sponte sua veniunt, camposque & flumina late  
 Curva tenent: ut molle siler, lentæque genestæ,

Populus, & glauca canentia fronde salicta.  
 Pars autem posito surgunt de semine: ut altæ  
 Castaneæ, nemorumq; Jovi quæ maxuma frondet 15  
 Æsculus, atque habitæ Grajis oracula quercus.  
 Pullulat ab radice aliis densissima silva:  
 Ut cerasis, ulmisque: etiam Parnasia laurus  
 Parva sub ingenti matris se subjicit umbra.  
 Hos Natura modos primum dedit: his genus omne 20  
 Silvarum, fruticumq; viret, nemorumque sacrorum.  
 Sunt alii, quos ipse viâ sibi reperit usus.  
 Hic plantas tenero abscondens de corpore matrum  
 Deposuit sulcis: hic stirpes obruit arvo,  
 Quadrifidasque ludes, & acuto robore vallos: 25  
 Silvarumque aliæ pressos propaginis arcus  
 Expectant, & viva sua plantaria terra.  
 Nil radicis egent aliæ: summumque putator  
 Haud dubitat terræ referens mandare cacumen.  
 Quin & caudicibus sectis (mirabile dictu) 30  
 Truditur è sicco radix oleagina ligno.  
 Et sæpe alterius ramos inpune videmus  
 Vertere in alterius; mutataque insita mala  
 Ferre pirum, & prunis lapidosa rubescere corna.  
 Quare agite ô, proprios generatim discite cultus, 35  
 Agricolaë, fructusque feros mollite colendo:

Neu segnes jaceant terræ. juvat Ismara Baccho  
 Conferere, atque olea magnum vestire Taburnum.  
 Tuque ades, inceptumque una decurre laborem,  
 O decus, ô famæ merito pars maxuma nostræ, 40  
 Mæcenas, pelagoque volans da vela patenti.  
 Non ego cuncta meis amplecti versibus opto:  
 Non, mihi si linguæ centum sint, oraque centum,  
 Ferrea vox. ades, & primi lege littoris oram.  
 In manibus terræ. non hic te carmine ficto, 45  
 Atque per ambages & longa exorsa tenebo.  
 Sponte sua quæ se tollunt in luminis auras,  
 Infecunda quidem, sed læta & fortia surgunt.  
 Quippe solo natura subest. tamen hæc quoq; si quis  
 Inferat, aut scrobibus mandet mutata subactis, 50  
 Exuerint silvestrem animum: cultuque frequenti  
 In quascumque voces artis, haud tarda sequentur.  
 Nec non & sterilis, quæ stirpibus exit ab imis,  
 Hoc faciet, vacuos si sit digesta per agros:  
 Nunc altæ frondes, & rami matris opacant, 55  
 Crescentique adimunt fœtus, uruntque ferentem.  
 Jam, quæ seminibus jactis se sustulit arbor  
 Tarda venit, seris factura nepotibus umbram:  
 Pomaque degenerant succos oblita priores:  
 Et turpis avibus prædam fert uva racemos. 60

Scilicet omnibus est labor inpendendus ; & omnes  
 Cogendæ in sulcum, ac multa mercede domandæ.  
 Sed truncis oleæ melius, propagine vites,  
 Respondent, solido Paphiæ de robore myrtus.  
 Plantis & duræ coruli nascuntur, & ingens 65  
 Fraxinus, Herculeæque arbos umbrosa coronæ,  
 Chaoniique patris glandes : etiam ardua palma  
 Nascitur, & casus abies visura marinos.  
 Inferitur vero & foetu nucis arbutus horrida :  
 Et steriles platani malos gessere valentis : 70  
 Castaneæ fagos, ornulque incanuit albo  
 Flore piri, glandemque sues fregere sub ulmis.  
 Nec modus inferere atque oculos inponere simplex.  
 Nam qua se medio trudent de cortice gemmæ,  
 Et tenuis rumpunt tunicas, angustus in ipso 75  
 Fit nodo sinus : huc aliena ex arbore germen  
 Includunt, udoque docent inolescere libro.  
 Aut rursus enodes trunci refecantur, & alte  
 Finditur in solidum cuneis via : deinde feraces  
 Plantæ inmittuntur : nec longum tempus, & ingens 80  
 Exiit ad cælum ramis felicibus arbos :  
 Miraturque novas frondis, & non sua poma.  
 Præterea genus haud unum, nec fortibus ulmis,  
 Nec salici, lotoque, neque Idæis cyparissis.

Nec pingues unam in faciem nascuntur oliuæ, 85  
 Orchades, & radii, & amarâ paulia baccâ,  
 Pomaque, & Alcinoi silvæ : nec furculus idem  
 Crustumis, Syriisque piris, gravibusque volemis.  
 Non eadem arboribus pendet vindemia nostris,  
 Quam Methymnæo carpit de palmitè Lesbos : 90  
 Sunt Thasiæ vites, sunt & Mareotides albæ :  
 Pinguibus hæ terris habiles, levioribus illæ.  
 Et passo Pfythia utilior, tenuisque Lageos,  
 Tentatura pedes olim, vincituraque linguam :  
 Purpureæ, præciæque. & quo te carmine dicam, 95  
 Rhætica? nec cellis ideo contende Falernis.  
 Sunt etiam Amineæ vites, firmissima vina :  
 Tmolius adfurgit quibus, & rex ipse Phanæus,  
 Argitisque minor : cui non certaverit ulla,  
 Aut tantum fluere, aut totidem durare per annos. 100  
 Non ego te, Dis & mensis adcepta secundis,  
 Transierim, Rhodia, & tumidis, Bumaste, racemis.  
 Sed neque quam multæ species, nec nomina quæ sint,  
 Est numerus : neque enim numero comprehendere refert :  
 Quem qui scire velit, Libyci velit æquoris idem 105  
 Discere quam multæ zephyro turbentur arenæ :  
 Aut, ubi navigiis violentior incidit eurus,  
 Nosse, quot Ionii veniant ad litora fluctus.

Nec vero terræ ferre omnes omnia possunt.  
 Fluminibus salices, crassisque paludibus alni 110  
 Nascuntur: steriles saxosis montibus orni:  
 Litora myrtetis lætissima: denique apertos  
 Bacchus amat collis, aquilonem & frigora taxi.  
 Adspice & extremis domitum cultoribus orbem,  
 Eoasque domos Arabum, dictosque Gelonos. 115  
 Divisæ arboribus patriæ. sola India nigrum  
 Fert ebum: solis est turea virga Sabæis.  
 Quid tibi odorato referam sudantia ligno  
 Balsamaque, & baccas semper frondentis acanthi?  
 Quid nemora Æthiopum molli canentia lana? 120  
 Velleraque ut foliis depectant tenuia Seres?  
 Aut quos Oceano propior gerit India lucos,  
 Extremi sinus orbis? ubi aëra vincere summum  
 Arboris haud ullæ jactu potuere sagittæ.  
 Et gens illa quidem sumtis non tarda pharetris. 125  
 Media fert tristes lucos, tardumque saporem  
 Felicis mali; quo non præsentius ullum,  
 Pocula si quando sævæ infecere novercæ,  
 Miscueruntque herbas & non innoxia verba,  
 Auxilium venit, ac membris agit atra venena. 130  
 Ipsa ingens arbor, faciemque simillima lauro;  
 Et, si non alium late jactaret odorem,

Laurus erat. folia haud ullis labentia ventis:  
 Flos ad prima tenax. animas & olentia Medi  
 Ora fovent illo, & senibus medicantur anhelis. 135  
 Sed neque Medorum silvæ, ditissima terra,  
 Nec pulcher Ganges, atque auro turbidus Hermus,  
 Laudibus Italiæ certent: non Bactra, neque Indi,  
 Totaque turiferis Panchaïa pinguis arenis.  
 Hæc loca non tauri spirantes naribus ignem 140  
 Invertère, satis inmanis dentibus hydri;  
 Nec galeis, densisque virum seges horruit hastis:  
 Sed gravidæ fruges, & Bacchi Mallicus humor  
 Inplevere: tenent oleæ armentaque læta.  
 Hinc bellator equus campo sese arduus infert: 145  
 Hinc albi, Clitumne, greges, & maxuma taurus  
 Victima, sæpe tuo perfusi flumine sacro,  
 Romanos ad templa deum duxere triumphos.  
 Hic ver adfiduum, atque alienis mensibus æstas:  
 Bis gravidæ pecudes, bis pomis utilis arbor. 150  
 At rabidæ tigres absunt, & sæva leonum  
 Semina; nec miseros fallunt aconita legentis;  
 Nec rapit inmensos orbis per humum, neque tanto  
 Squameus in spiram tractu se conligit anguis.  
 Adde tot egregias urbis, operumque laborem, 155  
 Tot congesta manu præruptis oppida saxis:

Fluminaque antiquos subterlabentia muros .  
 An mare, quod supra, memorem, quodq; adluit infra,  
 Anne lacus tantos ? te, Lari maxume, teque  
 Fluctibus & fremitu adsurgens, Benace, marino? 160  
 An memorem portus, Lucrinoque addita clauftra:  
 Atque indignatum magnis stridoribus æquor,  
 Julia qua ponto longe sonat unda refluxo,  
 Tyrrhenusque fretis inmittitur æstus Avernis?  
 Hæc eadem argenti rivos, ærisque metalla 165  
 Ostendit venis, atque auro plurima fluxit .  
 Hæc genus acre virum Marfos, pubemque Sabellam,  
 Adfuetumque malo Ligurem, Volcosque verutos  
 Extulit: hæc Decios, Marios, magnosque Camillos:  
 Scipiadas duros bello: & te, maxume Cæsar, 170  
 Qui nunc extremis Asiæ jam victor in oris,  
 Inbellem avertis Romanis arcibus Indum .  
 Salve, magna parens frugum, Saturnia tellus;  
 Magna virum: tibi res antiquæ laudis & artis  
 Ingredior, sanctos ausus recludere fontis, 175  
 Ascræumque cano Romana per oppida carmen .  
 Nunc locus arborum ingeniis: quæ robora cuique,  
 Quis color, & quæ sit rebus natura ferendis .  
 Difficiles primum terræ, collesque maligni,  
 Tenuis ubi argilla, & dumosis calculus arvis, 180

Palladia gaudent silva vivacis olivæ .  
 Indicio est, tractu surgens oleaster eodem  
 Plurimus, & strati baccis silvestribus agri .  
 At quæ pinguis humus, dulcique uligine læta,  
 Quique frequens herbis & fertilis ubere campus, 185  
 Qualem sæpe cava montis convalle solemus  
 Dispicere: huc summis liquuntur rupibus amnes,  
 Felicemque trahunt limum: quique editus austro,  
 Et filicem curvis invisam pascit aratris:  
 Hic tibi prævalidas olim multoque fluentis 190  
 Sufficiet Baccho vitis: hic fertilis uvæ,  
 Hic laticis, qualem pateris libamus & auro,  
 Inflavit quum pinguis ebur Tyrrhenus ad aras,  
 Lancibus & pandis fumantia reddimus exta .  
 Sin armenta magis studium vitulosque tueri, 195  
 Aut fœtus ovium, aut urentis culta capellas:  
 Saltus, & saturi petito longinqua Tarenti,  
 Et qualem infelix amisit Mantua campum,  
 Palescentem niveos herbofo flumine cycnos .  
 Non liquidi gregibus fontes, non gramina deerunt. 200  
 Et quantum longis carpent armenta diebus,  
 Exigua tantum gelidus ros nocte reponet .  
 Nigra fere, & presso pinguis sub vomere terra,  
 Et cui putre solum, (namque hoc imitamur arando)

Optuma frumentis. non ullo ex æquore cernes 205  
 Plura domum tardis decedere plaustra juvencis:  
 Aut unde iratus silvam devexit arator,  
 Et nemora evertit multos ignava per annos,  
 Antiquasque domos avium cum stirpibus imis  
 Eruit: illæ altum nidis petiere relictis. 210  
 At rudis enituit in pulso vomere campus.  
 Nam jejuna quidem clivosi glareæ ruris  
 Vix humilis apibus casias roremque ministrat:  
 Et tophus scaber, & nigris exesa chelydris  
 Creta, negant alios æque serpentibus agros 215  
 Dulcem ferre cibum, & curvas præbere latebras.  
 Quæ tenuem exhalat nebulam, fumosque volucris;  
 Et bibit humorem, & quum vult, ex se ipsa remittit:  
 Quæque suo viridi semper se gramine vestit,  
 Nec scabie & salsa lædit robigine ferrum, 220  
 Illa tibi lætis intextet vitibus ulmos:  
 Illa ferax oleo est: illam experiere colendo,  
 Et facilem pecori, & patientem vomeris unci.  
 Talem dives arat Capua, & vicina Vesuvo  
 Ora jugo, & vacuis Clanius non æquus Acerris. 225  
 Nunc, quo quamque modo possis cognoscere, dicam.  
 Rara sit, an supra morem si densa, requiras:  
 Altera frumentis quoniam favet, altera Baccho:

Densa magis Cereri, rarissima quæque Lyæo:  
 Ante locum capies oculis, alteque jubebis 230  
 In solido puteum demitti, omnemque repones  
 Rursus humum, & pedibus summas æquabis arenas.  
 Si deerunt, rarum, pecorique & vitibus almis  
 Aptius uber erit; sin in sua posse negabunt  
 Ire loca, & scrobibus superabit terra repletis, 235  
 Spissus ager: glebas cunctantis crassaque terga  
 Expecta, & validis terram proscinde juvencis.  
 Salsa autem tellus, & quæ perhibetur amara,  
 Frugibus infelix (ea nec mansuescit arando,  
 Nec Baccho genus, aut pomis sua nomina servat) 240  
 Tale dabit specimen. tu spisso vimine qualos,  
 Cola que prælorum fumosis deripe tectis.  
 Huc ager ille malus, dulcesque à fontibus undæ  
 Ad plenum calcentur: aqua eluctabitur omnis  
 Scilicet, & grandes ibunt per vimina guttæ; 245  
 At sapor indicium faciet manifestus, & ora  
 Tristia tentantum sensu torquebit amaror.  
 Pinguis item quæ sit tellus, hoc denique pacto  
 Discimus: haud umquam manibus jactata fatiscit,  
 Sed picis in morem ad digitos lentescit habendo. 250  
 Humida majores herbas alit, ipsaque iusto  
 Lætior. ah nimium ne sit mihi fertilis illa,

Neu se prævalidam primis ostendat ariftis!  
 Quæ gravis est, ipfo tacitam se pondere prodit, 254  
 Quæque levis. promptum est oculis prædiscere nigram,  
 Et quis cui color: at sceleratum exquirere frigus  
 Difficile est: piceæ tantum, taxique nocentes  
 Interdum, aut ederæ pandunt vestigia nigræ.  
 His animadversis, terram multo ante memento  
 Excoquere, & magnos scrobibus concidere montis, 260  
 Ante supinatas aquiloni ostendere glebas,  
 Quam lætum infodias vitis genus. optima putri  
 Arva solo: id venti curant, gelidæque pruinae,  
 Et labefacta movens robustus jugera fossor.  
 At, si quos haud ulla viros vigilantia fugit, 265  
 Ante locum similem exquirunt, ubi prima paretur  
 Arboribus seges, & quo mox digesta feratur;  
 Mutatam ignorent subito ne semina matrem.  
 Quin etiam cœli regionem in cortice signant:  
 Ut, quo quæque modo steterit, qua parte calores 270  
 Austrinos tulerit, quæ terga obverterit axi,  
 Restituant. adeo in teneris consuefcere multum est.  
 Collibus, an plano melius sit ponere vitem,  
 Quære prius. si pinguis agros metabere campi,  
 Densa sere: in denso non segnior ubere Bacchus. 275  
 Sin, tumulis adclive solum collisque supinos,

Indulge ordinibus: nec secius omnis in unguem  
 Arboribus positis secto via limite quadret.  
 Ut sæpe ingenti bello quum longa cohortis  
 Explicuit legio, & campo stetit agmen aperto, 280  
 Directæque acies, ac late fluctuat omnis  
 Ære renidenti tellus, nec dum horrida miscent  
 Proelia, sed dubius mediis Mars errat in armis.  
 Omnia sint paribus numeris dimensa viarum:  
 Non animum modo uti pascat prospectus inanem:  
 Sed quia non aliter vires dabit omnibus æquas 286  
 Terra, neque in vacuum poterunt se extendere rami.  
 Forsitan & scrobibus quæ sint fastigia quæras.  
 Ausim vel tenui vitem committere sulco.  
 Altior ac penitus terræ defigitur arbos, 290  
 Æsculus in primis: quæ quantum vertice ad auras  
 Ætherias, tantum radice in Tartara tendit.  
 Ergo non hiemes illam, non flabra, neque imbres  
 Convellunt: inmota manet, multosque nepotes,  
 Multa virûm volvens durando secula vincit. 295  
 Tum fortis late ramos & brachia tendens  
 Huc illuc, media ipsa ingentem sustinet umbram.  
 Neve tibi ad solem vergant vineta cadentem:  
 Neve inter vites corulum sere: neve flagella  
 Summa pete, aut summa desfringe ex arbore plantas:

(Tantus amor terræ) neu ferro læde retuso 301  
 Semina: neve oleæ silvestris infere truncos.  
 Nam sæpe incautis pastoribus excidit ignis,  
 Qui, furtim pingui primum sub cortice tectus,  
 Robora comprehendit, frondesque elapsus in altis 305  
 Ingentem cœlo sonitum dedit: inde secutus  
 Per ramos victor, perque alta cacumina regnat,  
 Et totum involvit flammis nemus, & ruit atram  
 Ad cœlum picea crassus caligine nubem:  
 Præsertim si tempestas à vertice silvis 310  
 Incubuit, glomeratque ferens incendia ventus.  
 Hoc ubi; non à stirpe valent, cæsæque reverti  
 Possunt, atque ima similes revirescere terra:  
 Infelix superat foliis oleaster amaris.  
 Nec tibi tam prudens quisquam persuadeat auctor, 315  
 Tellurem Borea rigidam spirante moveri.  
 Rura gelu tum claudit hiems: nec semine jacto  
 Concretam patitur radicem adfigere terræ.  
 Optima vinetis satio, quum vere rubenti  
 Candida venit avis, longis invisâ colubris: 320  
 Prima vel autumnî sub frigora, quum rapidus sol  
 Nondum hiemem contingit equis, jam præterit æstas.  
 Ver adeo frondi nemorum, ver utile silvis:  
 Vere tument terræ, & genitalia semina poscunt.

Tum pater omnipotens fecundis imbribus Æther 325  
 Conjugis in gremium lætæ descendit, & omnes  
 Magnus alit, magno commixtus corpore, fœtus.  
 Avia tum resonant avibus virgulta canoris,  
 Et Venerem certis repetunt armenta diebus:  
 Parturit almus ager, zephyrique tepentibus auris 330  
 Laxant arva sinus: superat tener omnibus humor;  
 Inque novos soles audent se germina tuto  
 Credere: nec metuit surgentis pampinus austros,  
 Aut actum cœlo magnis aquilonibus imbrem:  
 Sed trudit gemmas, & frondis explicat omnis. 335  
 Non alios prima crescentis origine mundi  
 Inluxisse dies, aliumve habuisse tenorem  
 Crediderim. ver illud erat: ver magnus agebat  
 Orbis, & hibernis parebant flatibus euri:  
 Quum primæ lucem pecudes hausere, virûmque 340  
 Ferrea progenies duris caput extulit arvis,  
 Inmissæque feræ silvis, & sidera cœlo.  
 Nec res hunc teneræ possent perferre laborem,  
 Si non tanta quies iret frigusque caloremque  
 Inter, & exciperet cœli indulgentia terras. 345  
 Quod superest, quæcumq; premes virgulta per agros,  
 Sparge fimo pingui, & multa memor occule terra:  
 Aut lapidem bibulum, aut squalentis infode conchas:



Inter enim labentur aquæ, tenuisque subibit  
 Halitus, atque animos tollent sata. jamque reperti, 350  
 Qui saxo super, atque ingentis pondere testæ  
 Urguerent: hoc effulos munimen ad imbris:  
 Hoc, ubi hiulca siti findit canis æstifer arva.  
 Seminibus positis, superest deducere terram  
 Sæpius ad capita, & duros jactare bidentis: 355  
 Aut pressio exercere solum sub vomere, & ipsa  
 Flectere luctantis inter vineta juvencos.  
 Tum levis calamos, & rasæ hastilia virgæ,  
 Fraxineasque aptare sudas, furcasque bicornis:  
 Viribus eniti quarum, & contemnere ventos 360  
 Adfuelcant, summasque sequi tabulata per ulmos.  
 Ac, dum prima novis adolescit frondibus ætas,  
 Parcendum teneris: & dum se lætus ad auras  
 Palmes agit, laxis per purum inmissus habenis.  
 Ipsa acie nondum falcis tentanda, sed uncis 365  
 Carpendæ manibus frondes, interque legendæ.  
 Inde ubi jam validis amplexæ stirpibus ulmos  
 Exierint, tum fringe comas, tum brachia tonde.  
 Ante reformidant ferrum: tum denique dura  
 Exerce imperia, & ramos conpescere fluentis. 370  
 Texendæ sepes etiam, & pecus omne tenendum:  
 Præcipue dum frons tenera inprudensque laborem:

Cui, super indignas hiemes solemque potentem,  
 Silvestres uri adlidue capreæque sequaces  
 Inludunt, pascuntur oves avidæque juvencæ. 375  
 Frigora nec tantum cana concreta pruina,  
 Aut gravis incumbens scopulis arentibus ætas,  
 Quantum illi nocuere greges, durique venenum  
 Dentis, & admorso signata in stirpe cicatrix.  
 Non aliam ob culpam Baccho caper omnibus aris 380  
 Cæditur, & veteres ineunt proscenia ludi:  
 Præmiaque ingeniis pagos & compita circum  
 Thesidæ posuere: atque inter pocula læti  
 Mollibus in pratis unctos saluere per utres.  
 Nec non Ausonii, Troja gens missa, coloni 385  
 Versibus incomtis ludunt, risuque soluto;  
 Oraque corticibus sumunt horrenda cavatis:  
 Et te, Bacche, vocant per carmina læta, tibi que  
 Oscilla ex alta suspendunt mollia pinu.  
 Hinc omnis largo pubescit vinea fœtu: 390  
 Complentur vallesque cavæ saltusque profundi,  
 Et quocumque deus circum caput egit honestum.  
 Ergo rite suum Baccho dicemus honorem  
 Carminibus patriis, lanceisque & liba feremus;  
 Et ductus cornu stabit sacer hircus ad aram, 395  
 Pinguiæque in veribus torrebimus exta columnis.

Est etiam ille labor curandis vitibus alter,  
 Cui numquam exhausti satis est: namque omne quotannis  
 Terque quaterque solum scindendum, glebaque versis  
 Æternum frangenda bidentibus: omne levandum 400  
 Fronde nemus; redit agricolis labor actus in orbem,  
 Atque in se sua per vestigia volvitur annus.  
 Ac jam olim seras posuit quum vinea frondis,  
 Frigidus & silvis aquilo decussit honorem;  
 Jam tum acer curas venientem extendit in annum 405  
 Rusticus, & curvo Saturni dente relictam  
 Persequitur vitem adtondens, fingitque putando.  
 Primus humum fodito, primus devecta cremato  
 Sarmata, & vallos primus sub tecta referto:  
 Postremus metito. bis vitibus ingruit umbra: 410  
 Bis segetem densis obducunt lentibus herbæ.  
 Durus uterque labor. laudato ingentia rura:  
 Exiguum colito. nec non etiam aspera rusci  
 Vimina per silvam, & ripis fluvialis arundo  
 Cæditur, incultique exercet cura salicti. 415  
 Jam vincetæ vites: jam falcem arbuta reponunt:  
 Jam canit extremos effœtus vinitor antes.  
 Sollicitanda tamen tellus, pulvisque movendus.  
 Et jam maturis metuendus Juppiter uvis.  
 Contra, non ulla est oleis cultura: neque illæ 420

Procurvam expectant falcem rastrosque tenaces,  
 Quum semel hæserunt arvis, aurisque tulerunt.  
 Ipsa satis tellus, quum dente recluditur unco,  
 Sufficit humorem, & gravidas cum vomere fruges.  
 Hoc pinguem & placitam paci nutritor olivam. 425  
 Poma quoque, ut primum truncos sensere valentis,  
 Et vires habuere suas, ad sidera raptim  
 Vi propria nituntur, opisque haud indiga nostræ.  
 Nec minus interea foetu nemus omne gravescit,  
 Sanguineisque inculta rubent aviaria baccis. 430  
 Tondentur cytisi, tædas silva alta ministrat,  
 Pascunturque ignes nocturni, & lumina fundunt.  
 Et dubitant homines serere, atque inpendere curam?  
 Quid majora sequar? salices, humilesque genestæ,  
 Aut illæ pecori frondem, aut pastoribus umbras 435  
 Sufficiunt: sepemque satis, & pabula melli.  
 Et juvat undantem buxo spectare Cytorum,  
 Naryciæque picis lucos: juvat arva videre,  
 Non rastros, hominum non ulli obnoxia curæ.  
 Ipsæ Caucasio steriles in vertice silvæ, 440  
 Quas animosi euri assidue franguntque feruntque,  
 Dant alios aliæ foetus: dant utile lignum  
 Navigiis pinos, domibus cedrumque cupressosque.  
 Hinc radios trivere rotis, hinc tympana plaustris

Agricolaë, & pandas ratibus posuere carinas. 445  
 Viminibus salices fecundæ, frondibus ulmi:  
 At myrtus validis hastilibus, & bona bello  
 Cornus: Ityræos taxi torquentur in arcus.  
 Nec tiliaë leves aut torno rasile buxum  
 Non formam adciunt, ferroque cavantur acuto. 450  
 Nec non & torrentem undam levis innatat alnus,  
 Missa Pado: nec non & apes examina condunt  
 Corticibusque cavis vitiosæque ilicis alveo.  
 Quid memorandum æque Baccheia dona tulerunt?  
 Bacchus & ad culpam causas dedit. ille furentis 455  
 Centauros letho domuit, Rhætumque Pholumque,  
 Et magno Hylæum Lapithis cratere minantem.  
 O fortunatos nimium, sua si bona norint,  
 Agricolas! quibus ipsa, procul discordibus armis,  
 Fundit humo facilem victum justissima tellus. 460  
 Si non ingentem foribus domus alta superbis  
 Mane salutantum totis vomit ædibus undam;  
 Nec varios inhiant pulchra testudine postes,  
 Inlusalque auro vestis, Ephyreiaque æra;  
 Alba neque Assyrio fucatur lana veneno, 465  
 Nec casia liquidi corrumpitur usus olivi:  
 At securæ quies, & nescia fallere vita,  
 Dives opum variarum; at latis otia fundis,

Speluncæ, vivique lacus; at frigida Tempe,  
 Mugitusque boum, mollesque sub arbore somni 470  
 Non absunt. illic saltus ac lustra ferarum,  
 Et patiens operum, exiguoque adueta juvenus,  
 Sacra deum, sanctique patres: extrema per illos  
 Justitia excedens terris vestigia fecit.  
 Me vero primum dulces ante omnia Musæ, 475  
 Quarum sacra fero ingenti percussus amore,  
 Adcipiant; coelique vias, & sidera monstrant:  
 Defectus solis varios, lunæque labores:  
 Unde tremor terris: qua vi maria alta tumescant  
 Objicibus ruptis, rursusque in se ipsa residant: 480  
 Quid tantum Oceano properent se tingere soles  
 Hiberni, vel quæ tardis mora noctibus obstet.  
 Sin, has ne possim naturæ adcedere partes,  
 Frigidus obstiterit circum præcordia sanguis;  
 Rura mihi & rigui placeant in vallibus amnes; 485  
 Flumina amem silvasque inglorius. ô, ubi campi,  
 Spercheosque, & virginibus bacchata Lacænis  
 Taygeta: ô, qui me gelidis in vallibus Hæmi  
 Sistat, & ingenti ramorum protegat umbra!  
 Felix, qui potuit rerum cognoscere causas: 490  
 Atque metus omnis & inexorabile fatum  
 Subjecit pedibus, strepitumque Acherontis avari!

Fortunatus & ille, deos qui novit agrestis,  
 Panaque, Silvanumque senem, Nymphasque sorores!  
 Illum non populi falces, non purpura regum 495  
 Flexit, & infidos agitans discordia fratres;  
 Aut conjurato descendens Dacus ab Histro:  
 Non res Romanæ, perituraque regna: neque ille,  
 Aut doluit miserans inopem, aut invidit habenti.  
 Quos rami fructus, quos ipsa volentia rura 500  
 Sponte tulere sua, carpsit: nec ferrea jura,  
 Infanumque forum, aut populi tabularia vidit.  
 Sollicitant alii remis freta cæca, ruuntque  
 In ferrum, penetrant aulas, & limina regum:  
 Hic petit excidiis urbem, miserisque Penatis, 505  
 Ut gemma bibat, & Sarrano indormiat ostro.  
 Condit opes alius, defossoque incubat auro.  
 Hic stupet adtonitus Rostris: hunc plausus hiantem  
 Per cuneos (geminatus enim) plebisque patrumque  
 Corripuit: gaudent perfusi sanguine fratrum, 510  
 Exfilioque domos & dulcia limina mutant;  
 Atque alio patriam quærunt sub sole jacentem.  
 Agricola incurvo terram dimovit aratro:  
 Hinc anni labor: hinc patriam parvosque nepotes  
 Sustinet: hinc armenta boum, meritosque juvencos. 515  
 Nec requies, quin aut pomis exuberet annus,

Aut foetu pecorum, aut Cerealis mergite culmi:  
 Proventuque oneret sulcos, atque horrea vincat.  
 Venit hiems, teritur Sicyonia bacca trapetis:  
 Glande sues læti redeunt: dant arbuta silvæ: 520  
 Et varios ponit foetus autumnus: & alte  
 Mitis in apricis coquitur vindemia saxis.  
 Interea dulces pendent circum oscula nati:  
 Casta pudicitiam servat domus: ubera vacca  
 Lactea demittunt: pinguesque in gramine læto 525  
 Inter se adversis luctantur cornibus hædi.  
 Ipse dies agitat festos: fufusque per herbam,  
 Ignis ubi in medio, & locii cratera coronant,  
 Te, libans, Lenæ, vocat: pecorisque magistris  
 Velocis jaculi certamina ponit in ulmo: 530  
 Corporaque agresti nudant prædura palæstra.  
 Hanc olim veteres vitam coluere Sabini:  
 Hanc Remus, & frater: sic fortis Etruria crevit:  
 Scilicet & rerum facta est pulcherrima Roma,  
 Septemque una sibi muro circumdedit arces. 535  
 Ante etiam sceptrum Dictæi regis, & ante  
 Impia quam cælis gens est epulata juvencis,  
 Aureus hanc vitam in terris Saturnus agebat.  
 Necdum etiam audierant inflari classica, necdum  
 Inpositos duris crepitare incudibus enses. 540

Sed nos inmensum spatiis confecimus æquor:  
Et jam tempus equum fumantia solvere colla.



M. P. f.



## GEORGICON LIBER III.



Et quoque, magna Pales, & te memo-  
rande canemus  
Pastor ab Amphryso: vos, silvæ amnes-  
que Lycæi.

Cætera, quæ vacuas tenuissent carmine mentis,  
Omnia jam volgata. quis aut Eurythæa durum,  
Aut inlaudati nescit Busridis aras ?  
Cui non dictus Hylas puer, & Latonia Delos ?  
Hippodameque, humeroque Pelops insignis eburno,  
Acer equis ? tentanda via est, qua me quoque possim  
Tollere humo, victorque virum volitare per ora.  
Primus ego in patriam mecum, modo vita superfit, 10  
Aonio rediens deducam vertice Musas:  
Primus Idumæas referam tibi, Mantua, palmas:

Et viridi in campo templum de marmore ponam  
 Propter aquam, tardis ingens ubi flexibus errat  
 Mincius, & tenera prætexit arundine ripas. 15  
 In medio mihi Cæsar erit, templumque tenebit.  
 Illi victor ego, & Tyrio conspectus in ostro  
 Centum quadrijugos agitabo ad flumina currus.  
 Cuncta mihi, Alpheum linquens lucosque Molorchi,  
 Curlibus & crudo decernet Græcia cestu. 20  
 Ipse, caput tonsæ foliis ornatus olivæ,  
 Dona feram. jam nunc sollemnis ducere pompas  
 Ad delubra juvat, cælosque videre juvencos:  
 Vel scæna ut versis discedat frontibus; utque  
 Purpurea intexti tollant aulæa Britanni. 25  
 In foribus pugnam ex auro solidoque elephanto  
 Gangaridum faciam, victorisque arma Quirini:  
 Atque hic undantem bello, magnumque fluentem  
 Nilum, ac navali surgentis ære columnas.  
 Addam urbis Asiæ domitas, pulsumque Niphaten, 30  
 Fidentemque fuga Parthum versisque sagittis,  
 Et duo rapta manu diverso ex hoste tropæa,  
 Bisque triumphatas utroque ab litore gentis.  
 Stabunt & Parii lapides, spirantia signa,  
 Assaraci proles, demissæque ab Jove gentis 35  
 Nomina, Troisque parens, & Trojæ Cynthius auctor.

Invidia infelix Furias annemque severum  
 Cocyti metuet, tortosque Ixionis anguis,  
 Inmanemque rotam, & non exsuperabile saxum.  
 Interea Dryadum silvas saltusque sequamur 40  
 Intactos, tua, Mæcenas, haud mollia iussa.  
 Te sine nil altum mens inchoat. en age, segnis  
 Rumpe moras: vocat ingenti clamore Cithæron,  
 Taygetique canes, domitrixque Epidaurus equorum:  
 Et vox ad sensu nemorum ingeminata remugit. 45  
 Mox tamen ardentis adcingar dicere pugnas  
 Cæsar, & nomen famâ tot ferre per annos,  
 Tithoni prima quot abest ab origine Cæsar.  
 Seu quis, Olympiæ miratus præmia palmæ,  
 Pascit equos; seu quis fortis ad aratra juvencos, 50  
 Corpora præcipue matrum legat. optuma torvæ  
 Forma bovis, cui turpe caput, cui plurima cervix,  
 Et crurum tenuis à mento palearia pendent.  
 Tum longo nullus lateri modus: omnia magna:  
 Pes etiam, & camuris hirtæ sub cornibus aures. 55  
 Nec mihi displiceat maculis insignis & albo,  
 Aut juga detrectans; interdumque aspera cornu,  
 Et faciem tauro propior, quæque ardua tota,  
 Et gradiens ima verrit vestigia cauda.  
 Ætas Lucinam, justosque pati hymenæos 60

Definit ante decem, post quatuor incipit annos:  
 Cetera nec foeturæ habilis, nec fortis aratris.  
 Interea, superat gregibus dum læta juvenas,  
 Solve mares: mitte in Venerem pecuaria primus,  
 Atque aliam ex alia generando suffice prolem. 65  
 Optumâ quæque dies miseris mortalibus ævi  
 Prima fugit: subeunt morbi, tristisque senectus;  
 Et labor, & duræ rapit inclementia mortis.  
 Semper erunt, quarum mutari corpora malis.  
 Semper enim refice: ac, ne post amissa requiras, 70  
 Anteveni, & subolem armento sortire quotannis.  
 Nec non & pecori est idem dilectus equino.  
 Tu modo, quos in spem statues submittere gentis,  
 Præcipuum jam inde a teneris inpende laborem.  
 Continuo pecoris generosi pullus in arvis 75  
 Altius ingreditur, & mollia crura reponit.  
 Primus & ire viam, & fluvios tentare minaces  
 Audet, & ignoto sese committere ponti:  
 Nec vanos horret strepitus. Illi ardua cervix,  
 Argutumque caput, brevis alvus, obesaque terga: 80  
 Luxuriatque toris animosum pectus: honesti  
 Spadices, glaucique; color deterrimus albis,  
 Et gilvo. Tum, si qua sonum procul arma dedere,  
 Stare loco nescit: micat auribus, & tremit artus:

Conlectumque premens volvit sub naribus ignem: 85  
 Densâ juba, & dextro jactata recumbit in armo.  
 At duplex agitur per lumbos spina, cavatque  
 Tellurem, & solido graviter sonat ungula cornu.  
 Talis Amyclæi domitus Pollucis habenis  
 Cyllarus, & quorum Graji meminere poëtæ, 90  
 Martis equi bijuges, & magni currus Achilli.  
 Talis & ipse jubam cervice effundit equina  
 Conjugis adventu pernix Saturnus, & altum  
 Pelion hinnitu fugiens implevit acuto. 94  
 Hunc quoque, ubi aut morbo gravis, aut jam segnior annis  
 Deficit, abde domo; nec turpi ignosce senectæ.  
 Frigidus in Venerem senior, frustra que laborem  
 Ingratum trahit: & si quando ad prælia ventum est.  
 Ut quondam in stipulis magnus sine viribus ignis,  
 Incassum furit. Ergo animos ævumque notabis 100  
 Præcipue: hinc alias artis, prolemque parentum,  
 Et quis cuique dolor victo, quæ gloria palmæ.  
 Nonne vides, quum præcipiti certamine campum  
 Conripuere, ruuntque effusi carcere currus,  
 Quum spes adrectæ juvenum, exsultantiaque haurit 105  
 Corda pavor pulsans: illi instant verbera torto,  
 Et proni dant lora: volat vi fervidus axis.  
 Jamque humiles, jamque elati sublime videntur

Aëra per vacuum ferri, atque adfurgere in auras.  
 Nec mora, nec requies. At fulvæ nimbus arenæ 110  
 Tollitur: humescunt spumis, flatuque sequentum.  
 Tantus amor laudum, tantæ est victoria curæ.  
 Primus Erichthonius currus & quatuor aufus  
 Jungere equos, rapidusque rotis insistere victor.  
 Frena Pelethronii Lapithæ, gyrosque dedere 115  
 Inpositi dorso, atque equitem docuere sub armis  
 Insultare solo, & gressus glomerare superbos.  
 Æquus uterque labor: æque juvenemque magistri  
 Exquirunt, calidumque animis & cursibus acrem.  
 Quamvis sæpe fuga versos ille egerit hostis, 120  
 Et patriam Epirum referat, fortisque Mycenæ;  
 Neptunique ipsa deducat origine gentem.  
 His animadversis instant sub tempus, & omnis  
 Inpendunt curas denso distendere pingui,  
 Quem legere ducem, & pecori dixere maritum: 125  
 Pubentesque secant herbas, fluviosque ministrant,  
 Farraque; ne blando nequeat superesse labori;  
 Invalidique patrum referant jejunia gnati:  
 Ipsa autem macie tenuant armenta volentes.  
 Atque, ubi concubitus primos jam nota voluptas 130  
 Sollicitat, frondisque negant, & fontibus arcent:  
 Sæpe etiam cursu quatiunt, & sole fatigant,

Quum graviter tunlis gemit area frugibus, & quum  
 Surgentem ad zephyrum paleæ jactantur inanes.  
 Hoc faciunt, nimio ne luxu obtusior usus 135  
 Sit genitali arvo, & sulcos oblimet inertis:  
 Sed rapiat sitiens Venerem, interiusque recondat.  
 Rursus cura patrum cadere, & succedere matrum  
 Incipit. Exactis gravidæ quum mensibus errant,  
 Non illas gravibus quisquam juga ducere plaustris, 140  
 Non saltu superare viam sit passus, & acri  
 Carpere prata fuga, fluviosque innare rapaces.  
 Saltibus in vacuis pascant, & plena secundum  
 Flumina: muscus ubi, & viridissima gramine ripa,  
 Speluncæque tegant, & laxea procubet umbra. 145  
 Est lucos Silari circa ilicibusque virentem  
 Plurimus Alburnum volitans, quoi nomen a silo  
 Romanum est, œstrum Graji vertere vocantes;  
 Asper, acerba sonans: quo tota exterrita silvis  
 Diffugiunt armenta; furit mugitibus æther 150  
 Concussus, silvæque & sicci ripa Tanagri.  
 Hoc quondam monstro horribilis exercuit iras  
 Inachiæ Juno pestem meditata juvencæ.  
 Hunc quoque, nam mediis fervoribus acrior instat,  
 Arcebis gravido pecori, armentaque pasces 155  
 Sole recens orto, aut noctem ducentibus astris.



Post partum cura in vitulos traducitur omnis:  
 Continuoque notas & nomina gentis inurunt:  
 Et quos aut pecori malint submittere habendo,  
 Aut aris servare sacros, aut scindere terram, 160  
 Et campum horrentem fractis invertere glebis.  
 Cetera pascuntur viridis armenta per herbas.  
 Tu quos ad studium atque usum formabis agrestem,  
 Jam vitulos hortare, viamque insiste domandi,  
 Dum faciles animi juvenum, dum mobilis ætas. 165  
 Ac primum laxos tenui de vimine circlos  
 Cervici subnecte: dehinc, ubi libera colla  
 Servitio adfuerint, ipsis e torquibus aptos  
 Junge pares, & coge gradum conferre juvencos:  
 Atque illis jam sæpe rotæ ducantur inanes 170  
 Per terram, & summo vestigia pulvere signent.  
 Post valido nitens sub pondere faginus axis  
 Instrepat, & junctos temo trahat æreus orbis.  
 Interea pubi indomitæ non gramina tantum,  
 Nec vefcas salicum frondes, ulvamque palustrem, 175  
 Sed frumenta manu carpes lata: nec tibi foetæ  
 More patrum nivea inplebunt mulctraria vaccæ,  
 Sed tota in dulcis consument ubera natos.  
 Sin ad bella magis studium, turmasque feroces,  
 Aut Alpheæ rotis prælabi flumina Pisæ, 180

Et Jovis in luco currus agitare volantis;  
 Primus equi labor est, animos atque arma videre  
 Bellantum, lituosque pati; tractuque gementem  
 Ferre rotam, & stabulo frenos audire sonantis.  
 Tum magis atque magis blandis gaudere magistri 185  
 Laudibus, & plausæ sonitum cervicis amare.  
 Atque hæc jam primo depulsus ab ubere matris  
 Audeat, inque vicem det mollibus ora capistris  
 Invalidus, & jamque tremens, & jam incius ævi.  
 At, tribus exactis, ubi quarta adcesserit æstas, 190  
 Carpere mox gyrum incipiat, gradibusque sonare  
 Conpositis, sinuetque alterna volumina crurum;  
 Sitque laboranti similis: tum cursibus auras  
 Tum vocet, ac per aperta volans, ceu liber habenis,  
 Æquora, vix summa vestigia ponat arena: 195  
 Qualis, Hyperboreis Aquilo quum densus ab oris  
 Incubuit, Scythiæque hiemis, atque arida differt  
 Nubila: tum segetes altæ campique natantes  
 Lenibus horrescunt flabris, summæque sonorem  
 Dant silvæ, longique urgent ad litora fluctus: 200  
 Ille volat, simul arva fuga, simul æquora verrens.  
 Hic vel ad Elei metas, & maxima campi  
 Sudabit spatia, & spumas aget ore cruentas:  
 Belgica vel molli melius feret effeda collo.

Tum demum crassa magnum farragine corpus 205  
 Crescere jam domitis finito: namque ante domandum  
 Ingentis tollent animos, prensique negabunt  
 Verbera lenta pati, & duris parere lupatis.

Sed non ulla magis vires industria firmat,  
 Quam Venerem & cæci stimulos avertere amoris, 210  
 Sive boum, sive est cui gratior usus equorum.  
 Atque ideo tauros procul atque in sola relegant  
 Pascua, post montem oppositum, & trans flumina lata:  
 Aut intus clausos satura ad præsepia servant.  
 Carpit enim vires paullatim, uritque videndo 215  
 Femina: nec nemorum patitur meminisse, nec herbæ.  
 Dulcibus illa quidem inlecebris & sæpe superbos  
 Cornibus inter se subigit decernere amantis:  
 Pascitur in magna silva formosa juvenca:  
 Illi alternantes multa vi prælia miscent 220  
 Vulneribus crebris: lavit ater corpora sanguis,  
 Versaque in obnixos urguntur cornua vasto  
 Cum gemitu. Reboant silvæque & longus Olympus.  
 Nec mos bellantis una stabulare: sed alter  
 Victus abit, longeque ignotis exulat oris; 225  
 Multa gemens, ignominiam, plagasque superbi  
 Victoris; tum, quos amisit inultus, amores;  
 Et stabula adspectans regnis excessit avitis.

Ergo omni cura vires exercet, & inter  
 Dura jacet pernox infrato laxa cubili, 230  
 Frondibus hirsutis & carice pascus acuta:  
 Et tentat sese, atque irasci in cornua discit  
 Arboris obnixus trunco: ventosque lacessit  
 Ictibus, & sparsa ad pugnam proludit arena.  
 Post, ubi conlectum robur, viresque resectæ, 235  
 Signa movet, præcepisque oblitum fertur in hostem:  
 Fluctus ut, in medio cœpit quum albescere ponto,  
 Longius, ex altoque sinum trahit; utque volutus  
 Ad terras, immane sonat per laxa, neque ipso  
 Monte minor procumbit: at ima exæstuat unda 240  
 Verticibus, nigramque alte subjectat arenam.  
 Omne adeo genus in terris hominumque ferarumque,  
 Et genus æquoreum, pecudes, pictæque volucres,  
 In furias ignemque ruunt. Amor omnibus idem.  
 Tempore non alio catulorum oblita læna 245  
 Sævior erravit campis: nec funera volgo  
 Tam multa informes urfi stragemque dedere  
 Per silvas. Tum sævus aper, tum pessima tigris.  
 Heu, male tum Libyæ solis erratur in agris.  
 Nonne vides, ut tota tremor pertentet equorum 250  
 Corpora, si tantum notas odor adtulit auras?  
 Ac neque eos jam frena virum, neque verbera sæva,

Non scopuli, rupesque cavæ, atque objecta retardant  
 Flumina, conreptosque undâ torquentia montis.  
 Ipse ruit, dentisque Sabellicus exacuit fus, 255  
 Et pede profubigit terram, fricat arbore costas  
 Atque hinc atque illinc, humeros ad volnera durat.  
 Quid juvenis, magnum cui versat in ossibus ignem  
 Durus amor? nempe abruptis turbata procellis  
 Nocte natat cæcâ serus freta: quem super ingens 260  
 Porta tonat cœli, & scopulis inlisa reclamant  
 Æquora; nec miseri possunt revocare parentes,  
 Nec moritura super crudeli funere virgo.  
 Quid lynces Bacchi variæ, & genus acre luporum,  
 Atque canum? quid, quæ inbelles dant proelia cervi?  
 Scilicet ante omnis furor est insignis equarum: 266  
 Et mentem Venus ipsa dedit, quo tempore Glauci  
 Potniades malis membra absumfere quadrigæ.  
 Illas ducit amor trans Gargara, tranfque sonantem  
 Ascanium: superant montis, & flumina tranant. 270  
 Continuoque avidis ubi subdita flamma medullis,  
 Vere magis (quia vere calor redit ossibus) illæ  
 Ore omnes versæ in zephyrum stant rupibus altis,  
 Exceptantque levis auras: & sæpe sine ullis  
 Conjugiis vento gravidæ (mirabile dictu) 275  
 Saxa per & scopulos & depressas convallis

Diffugiunt; non, Eure, tuos, neque solis ad ortus;  
 In Borean Caurumque, aut unde nigerrimus Ausfer  
 Nascitur, & pluvio contristat frigore cœlum.  
 Hic demum, hippomanes vero quod nomine dicunt  
 Pastores, lentum destillat ab inguine virus. 281  
 Hippomanes, quod sæpe malæ legere novercæ,  
 Miscueruntque herbas & non innoxia verba.  
 Sed fugit interea, fugit inreparabile tempus,  
 Singula dum capti circumvectamur amore. 285  
 Hoc satis armentis. Superat pars altera curæ,  
 Lanigeros agitare greges, hirtasque capellas.  
 Hic labor: hinc laudem fortes sperate coloni.  
 Nec sum animi dubius, verbis ea vincere magnum  
 Quam sit, & angustis hunc addere rebus honorem.  
 Sed me Parnasi deserta per ardua dulcis 291  
 Raptat amor. Juvat ire jugis, qua nulla priorum  
 Castaliam molli devertitur orbita clivo.  
 Nunc, veneranda Pales, magno nunc ore sonandum.  
 Incipiens stabulis edico in mollibus herbam 295  
 Carpere ovis, dum mox frondosa reducitur æstas:  
 Et multa duram stipula filicumque manipulis  
 Sternere subter humum, glacies ne frigida lædat  
 Molle pecus, scabiemque ferat, turpisque podagras.  
 Post hinc digressus jubeo frondentia capris 300

Arbuta sufficere, & fluvios præbere recentis;  
 Et stabula a ventis hiberno opponere soli  
 Ad medium conversa diem: quum frigidus olim  
 Jam cadit, extremoque inrorat Aquarius anno.  
 Hæ quoque non cura nobis levioere tuendæ; 305  
 Nec minor usus erit: quamvis Milesia magno  
 Vellera mutantur Tyrios incocta rubores.  
 Denfior hinc suboles: hinc largi copia lactis.  
 Quam magis exhausto spumaverit ubere mulctra;  
 Læta magis pressis manabunt flumina mammis. 310  
 Nec minus interea barbas incanaque menta  
 Cinyphii tondent hirci, lætasque comantis,  
 Usus in castrorum, & miseris velamina nautis.  
 Pascuntur vero silvas, & summa Lycei,  
 Horrentisque rubos, & amantis ardua dumos. 315  
 Atque ipsæ memores redeunt in tecta, suosque  
 Ducunt, & gravido superant vix ubere limen.  
 Ergo omni studio glaciem ventosque nivalis,  
 Quo minus est illis curæ mortalis egestas,  
 Avertes: victumque feres, & virgea lætus 320  
 Pabula; nec tota claudes scœnilia bruma.  
 At vero, zephyris quum læta vocantibus ætas,  
 In saltus utrumque gregem atque in pascua mittes.  
 Luciferi primo cum sidere frigida rura

Carpamus, dum mane novum, dum gramina canent,  
 Et ros in tenera pecori gratissimus herba. 326  
 Inde, ubi quarta sitim cœli conlegerit hora,  
 Et cantu querulæ rumpent arbuta cicadæ;  
 Ad puteos, aut alta greges ad stagna jubeto  
 Currentem ilignis potare canalibus undam: 330  
 Æstibus at mediis umbrosam exquirere vallem,  
 Sicubi magna Jovis antiquo robore quercus  
 Ingentis tendat ramos: aut sicubi nigrum  
 Ilicibus crebris sacra nemus ad cubet umbra.  
 Tum tenuis dare rursus aquas, & pascere rursus 335  
 Solis ad occasum. Quum frigidus aëra vesper  
 Temperat, & saltus reficit jam roscida luna,  
 Litora que Alcyonen resonant, acalanthida dumi.  
 Quid tibi pastores Libyæ, quid pascua versu  
 Prosequar, & raris habitata mapalia tectis? 340  
 Sæpe diem noctemque, & totum ex ordine mensem  
 Pascitur, itque pecus longa in deferta sine ullis  
 Hospitiis: tantum campi jacet. Omnia secum  
 Armentarius Afer agit, tectumque, Laremque,  
 Armaque, Amyclæumque canem, Cressamque pharetram.  
 Non secus ac patriis acer Romanus in armis 346  
 Injusto sub falce viam quum carpit, & hosti  
 Ante expectatum positus stat in agmine castris.

At non, qua Scythiæ gentes, Mæotiaque unda,  
 Turbidus & torquens flauentis Hister arenas, 350  
 Quaque redit medium Rhodope porrecta sub axem,  
 Illic clausa tenent stabulis armenta; neque ullæ  
 Aut herbæ campo adparent, aut arbore frondes:  
 Sed jacet aggeribus niveis informis, & alto  
 Terra gelu late, septemque adfurgit in ulnas. 355  
 Semper hiems, semper spirantes frigora cauri.  
 Tum sol pallentis haud unquam discutit umbras:  
 Nec quum inuictus equis altum petit æthera: nec quum  
 Præcipitem Oceani rubro lavit æquore currum.  
 Concresecunt subitæ currenti in flumine crustæ, 360  
 Undaque jam tergo ferratos sustinet orbis,  
 Puppibus illa prius patulis, nunc hospita plaustris.  
 Æraque dissiliunt volgo, vestesque rigescunt  
 Indutæ, cæduntque securibus humida vina,  
 Et totæ solidam in glaciem vertere lacunæ, 365  
 Stiriaque inpexis induruit horrida barbis.  
 Interea toto non secius aëre ninguit:  
 Intereunt pecudes, stant circumfusa pruinis  
 Corpora magna bouum: confertoque agmine cervi  
 Torpent mole nova, & summis vix cornibus extant.  
 Hos non inmissis canibus, non cassibus ullis, 371  
 Puniceæve agitant pavidos formidine pinnae:

Sed frustra oppositum trudentes pectore montem  
 Comminus obtruncant ferro, graviterque rudentes  
 Cædunt, & magno læti clamore reportant. 375  
 Ipsi in defollis specubus secura sub alta  
 Otia agunt terra, congestaque robora, totasque  
 Advolvere focis ulmos, ignique dedere.  
 Hic noctem ludo ducunt, & pocula læti  
 Fermento atque acidis imitantur vitea sorbis. 380  
 Talis Hyperboreo Septem subjecta trioni  
 Gens effrena virum Rhipæo tunditur Euro,  
 Et pecudum fulvis velatur corpora lætis.  
 Si tibi lanitium curæ; primum aspera silva,  
 Lappæque tribulique absint: fuge pabula læta: 385  
 Continuoque greges villis lege mollibus albos.  
 Illum autem, quamvis aries sit candidus ipse,  
 Nigra subest udo tantum cui lingua palato,  
 Rejice, ne maculis infuscet vellera pullis  
 Nascentum: plenoque alium circumspice campo. 390  
 Munere sic niveo lanæ, si credere dignum est,  
 Pan deus Arcadiæ captam te, Luna, fefellit,  
 In nemora alta vocans: nec tu adspernata vocantem.  
 At cui lactis amor, cytisum, lotosque frequentis  
 Ipse manu, salsaque ferat præsepibus herbas. 395  
 Hinc & amant fluvios magis, ac magis ubera tendunt,

Et salis occultum referunt in lacte saporem.  
 Multi jam excretos prohibent a matribus hædos,  
 Primaque ferratis præfigunt ora capistris.  
 Quod surgente die nullere horisque diurnis, 400  
 Nocte premunt; quod jam tenebris & sole cadente,  
 Sub lucem exportans calathis adit oppida pastor:  
 Aut parco sale contingunt, hiemique reponunt.  
 Nec tibi cura canum fuerit postrema: sed una  
 Velocis Spartæ catulos, acremque Molossum, 405  
 Pasce sero pingui. Numquam custodibus illis  
 Nocturnum stabulis furem, incursumque luporum,  
 Aut inpacatos a tergo horrebis Hiberos.  
 Sæpe etiam cursu timidos agitabis onagros,  
 Et canibus leporem, canibus venabere damas. 410  
 Sæpe volutabris pullos silvestribus apros  
 Latratu turbabis agens, montisque per altos  
 Ingentem clamore premes ad retia cervum.  
 Dilce & odoratam stabulis adendere cedrum,  
 Galbaneoque agitare gravis nidore chelydros. 415  
 Sæpe sub inmotis præsepibus aut mala tactu  
 Vipera delituit, cœlumque exterrita fugit:  
 Aut tecto adfuetus coluber succedere & umbræ,  
 Pestis acerba boum, pecorique adspargere virus,  
 Fovit humum. Cape saxa manu, cape robora, pastor,

Tollentemque minas & sibila colla tumentem 421  
 Dejice. Jamque fuga timidum caput abdidit alte,  
 Quum mediæ nexus, extremæque agmina caudæ  
 Solvuntur, tardosque trahit sinus ultimus orbis.  
 Est etiam ille malus Calabris in saltibus anguis, 425  
 Squamea convolvens sublato pectore terga,  
 Atque notis longam maculosus grandibus alvum:  
 Qui dum amnes ulli rumpuntur fontibus, & dum  
 Vere madent udo terræ, ac pluvialibus austris,  
 Stagna colit, ripisque habitans, hîc piscibus atram 430  
 Inprobus ingluviem ranisque loquacibus explet.  
 Postquam exulta palus, terræque ardore dehiscunt,  
 Exsilit in siccum, & flammantia lumina torquens  
 Sævit agris, asperque siti atque exterritus æstu.  
 Ne mihi tum mollis sub dio carpere somnos, 435  
 Neu dorso nemoris libeat jacuisse per herbas:  
 Quum positis novus exuviis nitidusque juvena  
 Volvitur, aut catulos tectis aut ova relinquens,  
 Arduus ad solem & linguis micat ore trifulcis.  
 Morborum quoque te causas & signa docebo. 440  
 Turpis ovis tentat scabies, ubi frigidus imber  
 Altius ad vivum perfedit, & horrida cano  
 Bruma gelu: vel quum tonlis inlotus adhæsit  
 Sudor, & hirsuti secuerunt corpora vepres.

Dulcibus idcirco fluviis pecus omne magistri 445  
 Perfundunt, udisque aries in gurgite villis  
 Mersatur, missusque secundo defluit amni:  
 Aut tonsum tristi contingunt corpus amurca,  
 Et spumas miscent argenti, vivaque sulfura,  
 Idæasque pices, & pinguis unguine ceras, 450  
 Scillamque, elleborosque gravis, nigrumque bitumen.  
 Non tamen ulla magis præsens fortuna laborum est,  
 Quam si quis ferro potuit rescindere summum  
 Ulceris os. Alitur vitium, vivitque tegendo:  
 Dum medicas adhibere manus ad vulnera pastor 455  
 Abnegat, aut meliora deos sedet omina poscens.  
 Quin etiam ima dolor balantum lapsus ad ossa  
 Quum furit, atque artus depascitur arida febris,  
 Profuit incensos æstus avertere, & inter  
 Ima ferire pedis salientem sanguine venam: 460  
 Bisaltæ quo more solent, acerque Gelonus,  
 Quum fugit in Rhodopen, atque in deserta Getarum,  
 Et lac concretum cum sanguine potat equino.  
 Quam procul aut molli succedere sæpius umbræ  
 Videris, aut summas carpentem ignavus herbas, 465  
 Extremamque sequi, aut medio procumbere campo  
 Pascens, & seræ solam decedere nocti:  
 Continuo culpam ferro conpescere, prius quam

Dira per incautum serpant contagia volgus.  
 Non tam creber agens hiemem ruit æquore turbo, 470  
 Quam multæ pecudum pestes. Nec singula morbi  
 Corpora conripiunt; sed tota æstiva repente,  
 Spemq; gregemq; simul, cunctamq; ab origine gentē.  
 Tum sciat, aërias Alpibus, & Norica si quis  
 Castella in tumulis, & Iapidis arva Timavi, 475  
 Nunc quoque post tanto videat desertaque regna  
 Pastorum, & longe saltus lateque vacantis.  
 Hic quondam morbo cœli miseranda coorta est  
 Tempestas, totoque autumnus incanduit æstu,  
 Et genus omne neci pecudum dedit, omne ferarum:  
 Conruptique lacus: infecit pabula tabo. 481  
 Nec via mortis erat simplex; sed ubi ignea venis  
 Omnibus acta litis miseros adduxerat artus:  
 Rursus abundabat fluidus liquor: omniaque in se  
 Ossa minutatim morbo conlapsa trahebat. 485  
 Sæpe in honore Deum medio stans hostia ad aram,  
 Lanea dum nivea circumdatur infula vitta,  
 Inter cunctantis cecidit moribunda ministros.  
 Aut si quam ferro mactaverat ante sacerdos,  
 Inde neque inpositis ardent altaria fibris; 490  
 Nec responsa potest consultus reddere vates:  
 Ac vix suppositi tinguuntur sanguine cultri,

Summaque jejuna sanie infuscatur arena.  
 Hinc lætis vituli volgo moriuntur in herbis,  
 Et dulcis animas plena ad præsepia reddunt. 495  
 Hinc canibus blandis rabies venit, & quatit ægros  
 Tussis anhela sues, ac faucibus angit obesis.  
 Labitur infelix, studiorum atque inmemor herbæ,  
 Victor equus, fontisque avertitur, & pede terram  
 Crebra ferit: demissæ aures: incertus ibidem 500  
 Sudor; & ille quidem morituris frigidus: aret  
 Pellis, & ad tactum tractanti dura resistit.  
 Hæc ante exitium primis dant signa diebus.  
 Sin in processu coepit crudescere morbus,  
 Tum vero ardentis oculi, atque adtractus ab alto 505  
 Spiritus, interdum gemitu gravis, imaque longo  
 Illa singultu tendunt: it naribus ater  
 Sanguis, & obsessas fauces premit aspera lingua.  
 Profuit inserto latices infundere cornu  
 Lenæos: ea visa salus morientibus una. 510  
 Mox erat hoc ipsum exitio, furis que relecti  
 Ardebant, ipsique suos, jam morte sub ægra,  
 (DI meliora piis, erroremque hostibus illum!)  
 Discissos nudis laniabant dentibus artus.  
 Ecce autem duro fumans sub vomere taurus 515  
 Concidit, & mixtum spumis vomit ore cruorem,

Extremosque ciet gemitus. It tristis arator,  
 Mœrentem abjungens fraterna morte juvencom:  
 Atque opere in medio defixa relinquit aratra.  
 Non umbra altorum nemorum, non mollia possunt 520  
 Prata movere animum, non qui per saxa volutus  
 Purior electro campum petit amnis: at ima  
 Solvuntur latera, atque oculos stupor urguet inertis,  
 Ad terramque fluit devexo pondere cervix.  
 Quid labor, aut benefacta juvant? quid vomere terras  
 Invertisse gravis? atqui non Massica Bacchi 526  
 Munera, non illis epulæ nocuere repostæ:  
 Frondibus & victu pascuntur simplicis herbæ.  
 Pocula sunt fontes liquidi, atque exercita cursu  
 Flumina, nec somnos abrumpit cura salubres. 530  
 Tempore non alio dicunt regionibus illis  
 Quælitas ad sacra boves Junonis, & uris  
 Inparibus ductos alta ad donaria currus.  
 Ergo ægre rastris terram rimantur, & ipsis  
 Unguibus infodiunt fruges, montisque per altos 535  
 Contenta cervice trahunt stridentia plaustra.  
 Non lupus infidias explorat ovilia circum,  
 Nec gregibus nocturnus obambulat: acrior illum  
 Cura domat: timidi damæ cervique fugaces  
 Nunc interque canes & circum tecta vagantur. 540  
 Jam maris inmensi prolem, & genus omne natantum



Litore in extremo, ceu naufraga corpora, fluctus  
 Proluit: insolitæ fugiunt in flumina phocæ.  
 Interit & curvis frustra defensa latebris  
 Vipera, & adtoniti squamis adstantibus hydri. 545  
 Iplis est aër avibus non æquus, & illæ  
 Præcipites alta vitam sub nube relinquunt.  
 Præterea jam nec mutari pabula refert,  
 Quæsitæque nocent artes: cessere magistri  
 Philyrides Chiron, Amythaoniusque Melampus. 550  
 Sævit & in lucem Stygiis emissa tenebris  
 Pallida Tisiphone, morbos agit ante metumque,  
 Inque dies avidum surgens caput altius effert.  
 Balatu pecorum & crebris mugitibus amnes,  
 Arentesque sonant ripæ, collesque supini. 555  
 Jamque catervatim dat stragem, atque aggerat iplis  
 In stabulis turpi dilapsa cadavera tabo:  
 Donec humo tegere, ac foveis abscondere discunt.  
 Nam neque erat coriis usus: nec viscera quisquam  
 Aut undis abolere potest, aut vincere flamma: 560  
 Nec tondere quidem morbo illuvieque peresa  
 Vellera, nec telas possunt attingere putris.  
 Verum etiam invisos si quis tentarat amictus;  
 Ardentes papulæ, atque immundus olentia sudor  
 Membra sequebatur. Nec longo deinde moranti 565  
 Tempore contactos artus facer ignis edebat.



## GEORGICON LIBER IV.



PROTINUS aërii mellis cœ-  
 lestia dona  
 Exsequar. Hanc etiam, Mæcenas,  
 adspice partem.

Admiranda tibi levium spectacula rerum,  
 Magnanimosque duces, totiusque ordine gentis  
 Mores, & studia, & populos, & prælia dicam. 5  
 In tenui labor: at tenuis non gloria; si quem  
 Numina læva sinunt, auditque vocatus Apollo.

Principio sedes apibus statioque petenda,  
 Quo neque sit ventis aditus, (nam pabula venti  
 Ferre domum prohibent) neque oves hædique petulci  
 Floribus insultent, aut errans bucula campo 11  
 Decutiat rorem, & surgentis adterat herbas.

Absint & picti squalentia terga lacerti  
 Pinguibus a stabulis, meropelque, aliæque volucres;  
 Et manibus Procne pectus signata cruentis. 15  
 Omnia nam late vastant, ipsalque volantis  
 Ore ferunt dulcem nidis inmitibus escam.  
 At liquidi fontes & stagna virentia musco  
 Adlint, & tenuis, fugiens per gramina, rivus,  
 Palmaque vestibulum aut ingens oleaster inumbret. 20  
 Ut, quum prima novi ducent examina reges  
 Vere suo, ludetque favis emissa Juventus,  
 Vicina invitet decedere ripa calori;  
 Obviaque hospitii teneat frondentibus arbor.  
 In medium, seu stabit iners, seu profluet humor, 25  
 Transversas salices, & grandia conjice saxa:  
 Pontibus ut crebris possint consistere, & alas  
 Pandere ad æstivum solem; si forte morantis  
 Sparserit, aut præceps Neptuno immerferit Eurus.  
 Hæc circum casæ virides, & olentia late 30  
 Serpilla, & graviter spirantis copia thymbræ  
 Floreat, inriguumque bibant violaria fontem.  
 Ipsa autem, seu corticibus tibi suta cavatis,  
 Seu lento fuerint alvearia vimine texta,  
 Angusto habeant aditus. Nam frigore mella 35  
 Cogit hiems, eademque calor liquefacta remittit.

Utraque vis apibus pariter metuenda: neque illæ  
 Nequicquam in tectis certatim tenuia cera  
 Spiramenta linunt, fucosque & floribus oras  
 Explent, conlectumque hæc ipsa ad munera gluten,  
 Et visco & Phrygiæ servant pice lentius Idæ. 41  
 Sæpe etiam effollis (si vera est fama) latebris  
 Sub terra fovère larem, penitusque repertæ  
 Punicibusque cavis, exesæque arboris antro.  
 Tu tamen e levi rimosa cubilia limo 45  
 Ungue fovens circum, & raras superinjice frondis.  
 Neu propius tectis taxum line, neve rubentis  
 Ure foco caneros, altæ neu crede paludi:  
 Aut ubi odor cœni gravis, aut ubi concava pulsu  
 Saxa sonant, vocisque offensa resultat imago. 50  
 Quod superest, ubi pullam hiemem sol aureus egit  
 Sub terras, cœlumque æstiva luce reclusit;  
 Illæ continuo saltus silvasque peragrant,  
 Purpureosque metunt flores, & flumina libant  
 Summa leves. Hinc nescio qua dulcedine lætæ 55  
 Progeniem nidosque fovent: hinc arte recentis  
 Excudunt ceras, & mella tenacia fingunt.  
 Hinc ubi jam emissum caveis ad sidera cœli  
 Nare per æstatem liquidam suspexeris agmen,  
 Obscuramque trahi vento mirabere nubem; 60

Contemplator : aquas dulcis, & frondea semper  
 Tecta petunt. Huc tu iustos adsperge sapes,  
 Trita melisphylla, & cerinthæ ignobile gramen:  
 Tinnitufque cie, & Matris quate cymbala circum.  
 Ipsæ confident medicatis sedibus : ipsæ 65  
 Intima more suo sese in cunabula condent.  
 Sin autem ad pugnam exierint; (nam sæpe duobus  
 Regibus incessit magno discordia motu)  
 Continuoque animos volgi & trepidantia bello  
 Corda licet longe præsciscere : namque morantis 70  
 Martius ille æris rauci canor increpat, & vox  
 Auditur fractos sonitus imitata tubarum.  
 Tum trepidæ inter se coeunt, pennisque coruscant,  
 Spiculaque exacuunt rostris, aptantque lacertos,  
 Et circa regem atque ipsa ad prætoria densæ 75  
 Miscentur, magnisque vocant clamoribus hostem.  
 Ergo, ubi ver nactæ sudum camposque patentis,  
 Erumpunt portis; concurritur; æthere in alto  
 Fit sonitus, magnum mixtæ glomerantur in orbem,  
 Præcipitesque cadunt. Non densior aëre grando, 80  
 Nec de concussa tantum pluit ilice glandis.  
 Ipsi per medias acies, insignibus alis,  
 Ingentis animos angusto in pectore versant.  
 Usque adeo obnixi non cedere, dum gravis aut hos,

Aut hos versa fugâ victor dare terga subegit. 85  
 Hi motus animorum atque hæc certamina tanta  
 Pulveris exigui jactu compressa quiescent.  
 Verum ubi ductores acie revocaveris ambo;  
 Deterior qui visus, eum, ne prodigus oblit,  
 Dede neci: melior vacua sine regnet in aula. 90  
 Alter erit maculis auro squalentibus ardens:  
 (Nam duo sunt genera) hic melior, insignis & ore,  
 Et rutilus clarus squamis: ille horridus alter  
 Desidia, latamque trahens inglorius alvum.  
 Ut binæ regum facies, ita corpora plebis. 95  
 Namque aliæ turpes horrent: ceu pulvere ab alto  
 Quum venit, & sicco terram spuit ore viator  
 Aridus: elucent aliæ, & fulgore coruscant  
 Ardentes auro, & paribus lita corpora guttis.  
 Hæc potior suboles. Hinc coeli tempore certo 100  
 Dulcia mella premes: nec tantum dulcia, quantum  
 Et liquida, & durum Bacchi domitura saporem.  
 At quum incerta volant, cœloque examina ludunt,  
 Contemnuntque favos, & frigida tecta relinquunt;  
 Instabilis animos ludo prohibebis inani. 105  
 Nec magnus prohibere labor. Tu regibus alas  
 Eripe. Non illis quisquam cunctantibus altum  
 Ire iter, aut castris audebit vellere signa.

Invitent croceis halantes floribus horti,  
 Et custos furum atque avium cum falce saligna 110  
 Hellepontiaci servet tutela Priapi.  
 Ipse thymum pinosque ferens de montibus altis  
 Tecta serat late circum, cui talia curæ:  
 Ipse labore manum duro terat: ipse feracis  
 Figat humo plantas, & amicos inriget imbris. 115  
 Atque equidem, extremo ni jam sub fine laborum  
 Vela traham, & terris festinem advertere proram;  
 Forsitan &, pinguis hortos quæ cura colendi  
 Ornaret, canerem, biferique rosaria Pæsti:  
 Quoque modo potis gauderent intuba rivis; 120  
 Et virides apio ripæ, tortulque per herbam  
 Cresceret in ventrem cucumis: nec sera comantem  
 Narcissum, aut flexi tacuissim vimen acanthi,  
 Pallentisque ederas, & amantis litora myrtos.  
 Namque sub Oebaliæ memini me turribus altis, 125  
 Qua niger humectat flaventia culta Galæus,  
 Corycium vidisse senem: cui pauca relictæ  
 Jugera ruris erant: nec fertilis illa juvencis,  
 Nec pecori opportuna seges, nec commoda Baccho.  
 Hic rarum tamen in dumis olus, albaque circum 130  
 Lilia, verbenasque premens, velscumque papaver,  
 Regum æquabat opes animis; seraque revertens

Nocte domum dapibus menas onerabat inemtis.  
 Primus vere rosam atque autumnos carpere poma,  
 Et quum tristis hiems etiamnum frigore laxa 135  
 Rumperet, & glacie cursus frenaret aquarum,  
 Ille comam mollis jam tum tondebat acanthi,  
 Æstatem increpitans seram zephyrosque morantis.  
 Ergo apibus foetis idem atque examine multo  
 Primus abundare, & spumantia cogere pressis 140  
 Mella favis: illi tiliæ, atque uberrima pinus:  
 Quotque in flore novo pomis se fertilis arbor  
 Induerat, totidem autumnos matura tenebat.  
 Ille etiam seras in versum distulit ulmos,  
 Eduramque pirum, & spinos jam pruna ferentis, 145  
 Jamque ministrantem platanum potantibus umbras.  
 Verum hæc ipse equidem spatiis exclusus iniquis  
 Prætereo, atque aliis post me memoranda relinquo.  
 Nunc age, naturas apibus quas Juppiter ipse  
 Addidit, expediam: pro qua mercede, canoros 150  
 Curetum sonitus crepitantiaque æra secutæ,  
 Dictæo cœli Regem pavere sub antro.  
 Solæ communis gnatos, consortia tecta  
 Urbis habent, magnisque agitant sub legibus ævum:  
 Et patriam solæ, & certos novere penatis: 155  
 Venturæque hiemis memores æstate laborem

Experiuntur, & in medium quæsitæ reponunt.  
 Namque aliæ victu invigilant, & fœdere pacto  
 Exercentur agris: pars intra septa domorum  
 Narcissi lacrimam, & lentum de cortice gluten, 160  
 Prima favis ponunt fundamina. Deinde tenacis  
 Suspendunt ceras: aliæ, spem gentis, adultos  
 Educunt fœtus: aliæ purissima mella  
 Stipant: & liquido distendunt nectare cellas.  
 Sunt, quibus ad portas cecidit custodia sortis: 165  
 Inque vicem speculantur aquas, & nubila cœli:  
 Aut onera adcipiunt venientum, aut agmine facto  
 Ignavum, fucos, pecus a præsepibus arcent.  
 Fervet opus, redolentque thymo fragrantia mella.  
 Ac veluti, lentis Cyclopes fulmina massis 170  
 Quum properant, alii taurinis follibus auras  
 Adcipiunt redduntque, alii stridentia tinguunt  
 Æra lacu: gemit inpositis incudibus Ætna.  
 Illi inter sese magna vi brachia tollunt  
 In numerum, versantque tenaci forcipe ferrum. 175  
 Non aliter, si parva licet componere magnis,  
 Cecropias innatus apes amor urguet habendi,  
 Munere quamque suo. Grandævis oppida curæ,  
 Et munire favos, & dædala fingere tecta.  
 At fessæ multa referunt se nocte minores, 180

Crura thymo plenæ: pascuntur & arbuta passim,  
 Et glaucas salices, casiamque, crocumque rubentem,  
 Et pinguem tiliam, & ferrugineos hyacinthos.  
 Omnibus una quies operum, labor omnibus unus.  
 Mane ruunt portis; nusquam mora. Rursus easdem 185  
 Vesper ubi e pastu tandem decedere campis  
 Admonit, tum tecta petunt, tum corpora curant.  
 Fit sonitus, mussantque oras & limina circum.  
 Post, ubi jam thalamis se composuere, filetur  
 In noctem, fessolque sopor suus occupat artus. 190  
 Nec vero a stabulis pluvia inpendente recedunt  
 Longius, aut credunt cœlo adventantibus Euris:  
 Sed circum tutæ sub mœnibus urbis aquantur,  
 Excurfusque brevis tentant, & sæpe lapillos,  
 Ut cumbæ instabiles fluctu jactante saburram, 195  
 Tollunt: his sese per inania nubila librant.  
 Illum adeo placuisse apibus mirabere morem,  
 Quod nec concubitu indulgent, nec corpora segnes  
 In Venerem solvunt, aut fœtus nixibus edunt:  
 Verum ipsæ e foliis natos & suavibus herbis 200  
 Ore legunt: ipsæ regem parvosque Quirites  
 Sufficiunt, aulæque, & cerea regna refingunt.  
 Sæpe etiam duris errando in cotibus alas  
 Attrivere, ultroque animam sub falce dedere.

Tantus amor florum, & generandi gloria mellis. 205  
 Ergo ipsas quamvis angusti terminus ævi  
 Excipiat: (neque enim plus septima ducitur ætas)  
 At genus immortale manet, multosque per annos  
 Stat Fortuna domus, & avi numerantur avorum.  
 Præterea regem non sic Ægyptos, & ingens 210  
 Lydia, nec populi Parthorum, aut Medus Hydaspes,  
 Observant. Rege incolumi mens omnibus una est:  
 Amisso rupere fidem; constructaque mella  
 Diripuere ipsæ, & crates solvère favorum.  
 Ille operum custos: illum admirantur, & omnes 215  
 Circumstant fremitu denso, stipantque frequentes;  
 Et sæpe adtollunt humeris, & corpora bello  
 Objectant, pulchramque petunt per volnera mortem.  
 His quidam signis atque hæc exempla secuti,  
 Esse apibus partem divinæ mentis, & haustus 220  
 Ætherios dixere. Deum namque ire per omnis  
 Terrasque, tractusque maris, cælumque profundum.  
 Hinc pecudes, armenta, viros, genus omne ferarum,  
 Quemque sibi tenuis nascentem arcessere vitas.  
 Scilicet huc reddi deinde ac resoluta referri 225  
 Omnia: nec morti esse locum, sed viva volare  
 Sideris in numerum, atque alto succedere cælo.  
 Si quando sedem augustam, servataque mella

Thesauris relines, prius haustu sparsus aquarum  
 Ora fove, fumosque manu prætende sequacis. 230  
 Bis gravidos cogunt scetus, duo tempora mellis,  
 Taygete simul os terris ostendit honestum  
 Plias, & Oceani spretos pede repulit amnis:  
 Aut eadem sidus fugiens ubi Piscis aquosi  
 Tristior hibernas cælo descendit in undas. 235  
 Illis ira modum supra est, lætæque venenum  
 Moribus inspirant, & spicula cæca relinquunt  
 Adfixæ venis, animalque in volnere ponunt.  
 Sin duram metues hiemem, parcelque futuro,  
 Contusosque animos, & res miserabere fractas; 240  
 At suffire thymo, cerasque recidere inanis  
 Quis dubitet? nam sæpe favos ignotus adedit  
 Stellio, & lucifugis congesta cubilia blattis:  
 Immunisque sedens aliena ad pabula fucus,  
 Aut asper crabro imparibus se immiscuit armis; 245  
 Aut dirum tineæ genus, aut invisæ Minervæ  
 Laxos in foribus suspendit aranea casses.  
 Quo magis exhaustæ fuerint, hoc acrius omnes  
 Incumbent generis lapsi sarcire ruinas,  
 Complebuntque foros, & floribus horrea texent. 250  
 Si vero (quoniam casus apibus quoque nostros  
 Vita tulit) tristi languebunt corpora morbo,

Quod jam non dubiis poteris cognoscere signis;  
 Continuo est ægris alius color: horrida voltum.  
 Deformat macies: tum corpora luce carentum 255  
 Exportant tectis, & tristia funera ducunt:  
 Aut illæ pedibus connexæ ad limina pendent,  
 Aut intus clausis cunctantur in ædibus omnes,  
 Ignavæque fame & contracto frigore pigræ.  
 Tum sonus auditur gravior, tractimque susurrant: 260  
 Frigidus ut quondam silvis inmurmurat Auster:  
 Ut mare sollicitum stridit refluentibus undis;  
 Æstuat ut clausis rapidus fornacibus ignis.  
 Hic jam galbaneos suadebo incendere odores,  
 Mellaque arundineis inferre canalibus, ultro 265  
 Hortantem, & fessas ad pabula nota vocantem.  
 Proderit & tunsum gallæ admiscere saporem,  
 Arentisque rosas, aut igni pingua multo  
 Defruta, vel psythia passos de vite racemos,  
 Cecropiumque thymum, & grave olentia centaurea. 270  
 Est etiam flos in pratis, cui nomen amello  
 Fecere agricolæ, facilis quærentibus herba:  
 Namque uno ingentem tollit de cespite silvam,  
 Aureus ipse: sed in foliis, quæ plurima circum  
 Funduntur, violæ subluet purpura nigræ. 275  
 Sæpe Deum nexis ornatæ torquibus aræ.

Asper in ore sapor. Tonlis in vallibus illum  
 Pastores, & curva legunt prope flumina Mellæ.  
 Hujus odorato radices incoque Baccho,  
 Pabulaque in foribus plenis adpone canistris. 280  
 Sed si quem proles subito defecerit omnis,  
 Nec, genus unde novæ stirpis revocetur, habebit;  
 Tempus & Arcadii memoranda inventa magistris  
 Pandere, quoque modo cælis jam sæpe juvenis  
 Infincerus apes tulerit cruor. Altius omnem 285  
 Expediam prima repetens ab origine famam.  
 Nam qua Pellæi gens fortunata Canopi  
 Adcolit effuso stagnantem flumine Nilum,  
 Et circum pictis vehitur sua rura safelis;  
 Quaque pharetratæ vicinia Perfidis urguet, 290  
 Et viridem Ægyptum nigra fecundat arena,  
 Et diversa ruens septem discurrit in ora  
 Usque coloratis amnis devexus ab Indis:  
 Omnis in hac certam regio jacet arte salutem.  
 Exiguus primum, atque ipsos contractus ad usus 295  
 Eligitur locus. Hunc angustique imbrice tecti,  
 Parietibusque premunt artis, & quatuor addunt,  
 Quatuor a ventis obliqua luce fenestras.  
 Tum vitulus, bima curvans jam cornua fronte,  
 Quæritur: huic geminæ nares, & spiritus oris 300

Multa reluctanti obsuitur, plagisque perempto  
 Tunsa per integram solvuntur viscera pellem.  
 Sic positum in clauso linqunt, & ramea costis  
 Subjiciunt fragmenta, thymum, caliaque recentis.  
 Hoc geritur, zephyris primum impellentibus undas, 305  
 Ante novis rubeant quam prata coloribus, ante  
 Garrula quam tignis nidum suspendat hirundo.  
 Interea teneris tepefactus in ossibus humor  
 Æstuat, & visenda modis animalia miris,  
 Trunca pedum primo: mox & stridentia pennis 310  
 Miscentur, tenuemque magis magis aëra carpunt:  
 Donec, ut æstivis effusus nubibus imber,  
 Erupere; aut ut, nervo pullante sagittæ,  
 Prima leves ineunt si quando prælia Parthi.  
 Quis Deus hanc, Musæ, quis nobis extudit artem? 315  
 Unde nova ingressus hominum experientia cepit?  
 Pastor Aristæus fugiens Peneia Tempe,  
 Amissis (ut fama) apibus morboque fameque,  
 Tristis ad extremi sacrum caput adstitit amnis,  
 Multa querens, atque hac adfatus voce parentem: 320  
 Mater Cyrene, mater, quæ gurgitis hujus  
 Ima tenes, quid me præclara stirpe Deorum,  
 (Si modo, quem perhibes, pater est Thymbræus Apollo)  
 Invisum fatis genuisti? aut quo tibi nostri

Pulsus amor? quid me cœlum sperare jubebas? 325  
 En etiam hunc ipsum vitæ mortalis honorem,  
 Quem mihi vix frugum & pecudum custodia sollers  
 Omnia tentanti extuderat, te matre, relinquo.  
 Quin age, & ipsa manu felicitis erue silvas;  
 Fer stabulis inimicum ignem, atque interfice mellis: 330  
 Ure sata, & validam in vitis molire bipennem;  
 Tanta meæ si te ceperunt tædia laudis.  
 At mater sonitum thalamo sub fluminis alti  
 Sensit. Eam circum Milesia vellera Nymphæ  
 Carpebant, hyali saturo fucata colore: 335  
 Drymoque, Xanthoque, Ligeaque, Phyllidoceque,  
 Cæsariem effusæ nitidam per candida colla:  
 Nesæe, Spioque, Thaliaque, Cymodoceque,  
 Cydippeque, & flava Lycorias; altera virgo,  
 Altera tum primos Lucinæ experta labores; 340  
 Clioque & Beroë soror, Oceanitides ambæ,  
 Ambæ auro, pictis incinctæ pellibus ambæ;  
 Atque Ephyre, atque Opis, & Asia Deiopea;  
 Et tandem positis velox Arethusa sagittis.  
 Inter quas curam Clymene narrabat inanem 345  
 Volcani, Martisque dolos, & dulcia furta;  
 Aque Chao densos divûm numerabat amores.  
 Carmine quo captæ, dum fuis mollia pensa



Devolvunt, iterum maternas inpulit auris  
 Luctus Aristæi, vitreisque sedilibus omnes 350  
 Obstupuere: sed ante alias Arethusa sorores  
 Prospiciens, summa flavum caput extulit unda.  
 Et procul: O gemitu non frustra exterrita tanto,  
 Cyrene soror; ipse tibi tua maxima cura  
 Tristis Aristæus Penei genitoris ad undam 355  
 Stat lacrimans, & te crudelem nomine dicit.  
 Huic percussa nova mentem formidine mater,  
 Duc age, duc ad nos; fas illi limina divom  
 Tangere, ait: simul alta jubet discedere late  
 Flumina, qua juvenis gressus inferret. At illum 360  
 Curvata in montis faciem circumstetit unda,  
 Adcepitque sinu vasto, misitque sub annem.  
 Jamque domum mirans genetricis, & humida regna,  
 Speluncisque lacus clausos, lucosque sonantis,  
 Ibat, & ingenti motu stupefactus aquarum, 365  
 Omnia sub magna labentia flumina terra  
 Spectabat diversa locis, Phasimque, Lycumque,  
 Et caput, unde altus primum se erumpit Enipeus,  
 Unde pater Tiberinus, & unde Aniena fluenta,  
 Saxosumque sonans Hypanis, Mysusque Caicus, 370  
 Et gemina auratus taurino cornua voltu  
 Eridanus: quo non alius per pingua culta

In mare purpureum violentior effluit amnis.  
 Postquam est in thalami pendentia punice tecta  
 Perventum, & gnati fletus cognovit inanes 375  
 Cyrene; manibus liquidos dant ordine fontis  
 Germanæ, tonsisque ferunt mantelia villis.  
 Pars epulis onerant mensas, & plena reponunt  
 Pocula. Panchæis adolefcunt ignibus aræ.  
 Et mater, Cape Mæonii carchesia Bacchi: 380  
 Oceano libemus, ait. Simul ipsa precatur  
 Oceanumque patrem rerum, Nymphasque sorores,  
 Centum quæ silvas, centum quæ flumina servant.  
 Terliquido ardentem perfudit nectare Vestam:  
 Ter flamma ad summum tecti subjecta reluxit. 385  
 Omine quo firmans animum, sic incipit ipsa:  
 Est in Carpathio Neptuni gurgite vates  
 Cæruleus Proteus, magnum qui piscibus æquor  
 Et juncto bipedum curru metitur equorum.  
 Hic nunc Emathiæ portus patriamque revisit 390  
 Pallenen. Hunc & Nymphæ veneramur, & ipse  
 Grandævus Nereus. Novit namque omnia vates,  
 Quæ sint, quæ fuerint, quæ mox ventura trahantur.  
 Quippe ita Neptuno visum est: inmania cujus  
 Armenta, & turpis pascit sub gurgite phocas. 395  
 Hic tibi, nate, prius vinculis capiendus, ut omnem

Expediat morbi causam, eventusque secundet.  
 Nam sine vi non ulla dabit præcepta, neque illum  
 Orando flecetes: vim duram & vincula capto  
 Tende. Doli circum hæc demum frangentur inanes. 400  
 Ipsa ego te, medios quum sol adcenderit æstus,  
 Quum sitiunt herbæ, & pecori jam gratior umbra est,  
 In secreta senis ducam, quo fessus ab undis  
 Se recipit; facile ut somno adgrediare jacentem.  
 Verum ubi conreptum manibus vinculisque tenebis; 405  
 Tum variæ eludent species atque ora ferarum.  
 Fiet enim subito sus horridus, atraque tigris,  
 Squamosusque draco, & fulva cervice læna:  
 Aut acrem flammæ sonitum dabit, atque ita vinculis  
 Excidet, aut in aquas tenues dilapsus abibit. 410  
 Sed quanto ille magis formas se vertet in omnis,  
 Tanto, gnate, magis contende tenacia vincula:  
 Donec talis erit mutato corpore, qualem  
 Videris, incepto tegeter quum lumina somno.  
 Hæc ait, & liquidum ambrosiæ diffundit odorem: 415  
 Quo totum nati corpus perduxit. At illi  
 Dulcis compositis spiravit crinibus aura,  
 Atque habilis membris venit vigor. Est specus ingens  
 Exeeli latere in montis, quo plurima vento  
 Cogitur, inque sinus scindit sese unda reductos; 420

Deprensus olim statio tutissima nautis.  
 Intus se vasti Proteus tegit objice saxi.  
 Hic juvenem in latebris aversum a lumine Nympha  
 Conlocat: ipsa procul nebulis obscura resistit.  
 Jam rapidus torrens sitientis Sirius Indos, 425  
 Ardebat; cælo & medium sol igneus orbem  
 Hauferat. Arebant herbæ, & cava flumina siccis  
 Faucibus ad limum radii tepefacta coquebant:  
 Quum Proteus consueta petens e fluctibus antra  
 Ibat. Eum vasti circum gens humida ponti 430  
 Exsultans rorem late disperfit amarum.  
 Sternunt se somno diversæ in litore phocæ.  
 Ipse, velut stabuli custos in montibus olim,  
 Vesper ubi e pastu vitulos ad tecta reducit,  
 Auditisque lupos acuunt balatibus agni, 435  
 Confidit scopulo medius, numerumque recenset:  
 Cujus Aristæo quoniam est oblata facultas,  
 Vix defessa senem passus componere membra,  
 Cum clamore ruit magno, manicisque jacentem  
 Occupat. Ille suæ contra non inmemor artis, 440  
 Omnia transformat sese in miracula rerum,  
 Ignemque, horribilemque feram, fluviumque liquentem.  
 Verum, ubi nulla fugam reperit pellacia, victus  
 In sese redit, atque hominis tandem ore locutus:

Nam quis te, juvenum confidentissime, nostras 445  
 Jussit adire domus? quidve hinc petis? inquit. At ille:  
 Scis, Proteu, scis ipse: neque est te fallere cuiquam.  
 Sed tu desine velle. Deum præcepta secuti  
 Venimus hinc lapsis quæsitum oracula rebus.  
 Tantum effatus. Ad hæc vates vi denique multa 450  
 Ardentis oculos intorsit lumine glauco,  
 Et graviter frendens, sic fatis ora resolvit:  
 Non te nullius exercent numinis iræ.  
 Magna luis commissa: tibi has miserabilis Orpheus  
 Haud quaquam ob meritum pœnas, ni fata resistent, 455  
 Suscitât; & rapta graviter pro conjuge sævit.  
 Illa quidem, dum te fugeret per flumina præceps,  
 Inmanem ante pedes hydrum moritura puella  
 Servantem ripas alta non vidit in herba.  
 At chorus æqualis Dryadum clamore supremos 460  
 Inplerunt montis. Flerunt Rhodopeiæ arces,  
 Altaque Pangæa, & Rhesi Mavortia tellus,  
 Atque Getæ, atque Hebrus, & Actias Orithyia.  
 Ipse cava solans ægrum testudine amorem,  
 Te, dulcis conjux, te solo in litore secum, 465  
 Te veniente die, te decedente canebat.  
 Tænarias etiam fauces, alta ostia Ditis,  
 Et caligantem nigra formidine lucum  
 Ingressus, Manisque adiit, Regemque tremendum,

Nesciaque humanis precibus mansuescere corda. 470  
 At cantu conmotæ Erebi de sedibus imis  
 Umbrae ibant tenues, simulacraque luce carentum:  
 Quam multa in foliis avium se millia condunt,  
 Vesper ubi, aut hibernus agit de montibus imber:  
 Matres, atque viri, defunctaque corpora vita 475  
 Magnanimùm heroum, pueri, innuptæque puellæ,  
 Inpositique rogis juvenes ante ora parentum,  
 Quos circum limus niger, & deformis arundo  
 Cocyti, tarda que palus inamabilis unda  
 Adligat, & novies Styx interfusa coercet. 480  
 Quin ipsæ stupuere domus, atque intima Lethi  
 Tartara, cæruleosque inplexæ crinibus anguis  
 Flumenides, tenuitque inhians tria Cerberus ora,  
 Atque Ixionii vento rota constitit orbis.  
 Jamque pedem referens casus evaserat omnis, 485  
 Redditaque Eurydice superas veniebat ad auras,  
 Pone sequens; namque hanc dederat Proserpina legem:  
 Quum subita incautum dementia cepit amantem,  
 Ignoscenda quidem, scirent si ignoscere Manes.  
 Restitit, Eurydicenque suam jam luce sub ipsa 490  
 Inmemor, heu, victusque animi respexit. Ibi omnis  
 Effusus labor, atque inmitis rupta tyranni  
 Foedera, terque fragor stagnis auditus Avernis.  
 Illa, Quis & me, inquit, miseram, & te perdidit, Orpheu?

Quis tantus furor? en iterum crudelia retro 495  
 Fata vocant, conditque natantia lumina somnus.  
 Jamque vale. Feror ingenti circumdata nocte,  
 Invalidasque tibi tendens, heu non tua, palmas!  
 Dixit. Et ex oculis subito, ceu fumus in auras  
 Conmixtus tenuis, fugit diversa: neque illum, 500  
 Prenfantem nequicquam umbras, & multa volentem  
 Dicere, præterea vidit: nec portitor Orci  
 Amplius objectam passus transire paludem.  
 Quid faceret? quo se rapta bis conjuge ferret?  
 Quo fletu Manis, qua Numina voce moveret? 505  
 Illa quidem Stygia nabat jam frigida cymba.  
 Septem illum totos perhibent ex ordine mensis  
 Rupe sub aëria deserti ad Strymonis undam  
 Flevisse, & gelidis hæc evoluisse sub antris,  
 Mulcentem tigris, & agentem carmine quercus. 510  
 Qualis populea mœrens Philomela sub umbra  
 Amissos queritur foetus; quos durus arator  
 Observans nido inplumis detraxit: at illa  
 Flet noctem, ramoque sedens miserabile carmen  
 Integrat, & mœstis late loca questibus inplet. 515  
 Nulla Venus, non ulli animum flexere hymenæi.  
 Solus Hyperboreas glacies, Tanaiumque nivalem,  
 Arvaque Rhipæis numquam viduata pruinis

Lustrabat, raptam Eurydicen, atque irrita Ditis  
 Dona querens. Spretæ Ciconum quo munere matres,  
 Inter sacra Deum, nocturnique orgia Bacchi, 521  
 Discerptum latos juvenem sparsere per agros.  
 Tum quoque marmorea caput a cervice revollsum,  
 Gurgite quum medio portans Oeagrius Hebrus  
 Volveret, Eurydicen vox ipsa & frigida lingua, 525  
 Ah miseram Eurydicen! anima fugiente vocabat:  
 Eurydicen toto referebant flumine ripæ.  
 Hæc Proteus: & se jactu dedit æquor in altum.  
 Quaque dedit, spumantem undam sub vertice torlit.  
 At non Cyrene: namque ultro adfata timentem: 530  
 Nate, licet tristis animo deponere curas.  
 Hæc omnis morbi causa: hinc miserabile Nymphæ,  
 Cum quibus illa choros lucis agitabat in altis,  
 Exitium misere apibus. Tu munera supplex.  
 Tende petens pacem, & faciles venerare Napæas. 535  
 Namque dabunt veniam votis, irasque remittent.  
 Sed, modus orandi qui sit, prius ordine dicam.  
 Quatuor eximios præstanti corpore tauros,  
 Qui tibi nunc viridis depascunt summa Lycei,  
 Delige, & intacta totidem cervice juvencas. 540  
 Quatuor his aras alta ad delubra Dearum  
 Constitue, & sacrum jugulis demitte cruorem:

Corporaque ipsa boum frondoso desere luco.  
 Post, ubi nona suos Aurora ostenderit ortus,  
 Inferias Orphei Lethæa papavera mittes, 545  
 Placatam Eurydicen vitula venerabere cæsa,  
 Et nigram mactabis ovem, lucumque revises.  
 Haud mora: continuo matris præcepta facellit:  
 Ad delubra venit; monstratas excitat aras;  
 Quatuor eximios præstanti corpore tauros 550  
 Ducit, & intacta totidem cervice juvencas.  
 Post, ubi nona suos Aurora induxerat ortus,  
 Inferias Orphei mittit, lucumque revisit.  
 Hic vero subitum ac dictu mirabile monstrum  
 Adspiciunt, liquefacta boum per viscera toto 555  
 Stridere apes utero, & ruptis effervere costis;  
 Immensaque trahi nubes: jamque arbore summa  
 Confluere, & lentis uvam demittere ramis.  
 Hæc super arborum cultu pecorumque canebam,  
 Et super arboribus: Cæsar dum magnus ad altum 560  
 Fulminat Euphraten bello, victorque volentis  
 Per populos dat jura, viamque adfectat Olympo.  
 Illo Virgilium me tempore dulcis alebat  
 Parthenope, studiis florentem ignobilis otii:  
 Carmina qui lusi pastorum, audaxque juventa, 565  
 Tityre, te patulæ cecini sub tegmine fagi.

B Nr 528629

8000

